

墓誌銘

江漢集



江漢集卷之十五目錄

墓誌銘

輸忠貢誠翼謨修紀光國忠勤貞亮效節協策

扈聖功臣輔國崇祿大夫議政府左贊成

兼判義禁府事禮曹判書知經筵事弘文

館大提學藝文館大提學知春秋館成均館

事海平府院君世子貳師文貞尹公墓誌

銘

并序

奮忠贊謨立紀靖社功臣大匡輔國崇祿大夫

議政府右議政兼領經筵事監春秋館事

新豐府院君 贈大匡輔國崇祿大夫議政

府領議政兼領 經筵弘文館藝文館春秋

館觀象監事 世子師文忠張公墓誌銘

并序

嘉善大夫行承政院都承旨兼 經筵參贊官

春秋館修撰官藝文館直提學尚瑞院正

贈資憲大夫吏曹判書兼知 經筵事弘文

館大提學藝文館大提學知春秋館成均館

事貞僖任公墓誌銘

并序

折衝將軍忠清道兵馬節度使 贈崇祿大夫

議政府左贊成兼判義禁府事武愍黃公墓

誌銘 并序

明總兵官朝鮮國輔國崇祿大夫三道水軍統
制使兼慶尚右道水軍節度使忠毅鄭公墓

誌銘 并序

弘文館校理承議郎知製教兼經筵侍讀

官春秋館記注官周公墓誌銘 并序

權知承文院副正字奉直郎贈通訓大夫司

諫院司諫兼春秋館編修官黃公墓誌銘 并序

徵士故朝散大夫冰庫別坐蔡公墓誌銘 并序

謝士廷贈送大水車與民坐車公墓詩

謝士廷贈送大水車與民坐車公墓詩

謝士廷贈送大水車與民坐車公墓詩

謝士廷贈送大水車與民坐車公墓詩

謝士廷贈送大水車與民坐車公墓詩

謝士廷贈送大水車與民坐車公墓詩

謝士廷贈送大水車與民坐車公墓詩

謝士廷贈送大水車與民坐車公墓詩

謝士廷贈送大水車與民坐車公墓詩

江漢集卷之十五

墓誌銘

輸忠貢誠翼謨修紀光國忠勤貞亮效節協策
扈聖功臣輔國崇祿大夫議政府左贊成兼
判義禁府事禮曹判書知經筵事弘文館大
提學藝文館大提學知春秋館成均館事海平
府院君世子貳師文貞尹公墓誌銘

并序

神宗皇帝二十年 昭敬王出狩義州 車駕次于
東坡驛召文靖尹公斗壽文貞尹公根壽 諭曰倭
奴不庭涉大海蹂我疆土予西遷以圖匡復卿兄弟

無離左右公兄弟稽首流涕誓以死報於是文靖公以政事擢右議政自行在至于還都獨相曰王室逐倭奴遂復疆土而文貞公以辭命擢大提學具奏咨乞師旅一歲中三趨廣寧六赴遼陽而聲名聞於天下歷說皇朝諸將士得其懽心故皇朝出師救之與慈母之拯赤子無以異也詩云予曰有先後予曰有奔奏方王室危亂之時公兄弟或先後焉或奔奏焉皆有大功而文貞宣力四方爲最多於乎盛矣公字子固善山人也曾祖繼丁官至掌苑署掌苑贈吏曹判書祖希琳贈議政府左贊成父

忤官至軍資監正 贈議政府領議政母玄氏貞敬

夫人以賢明聞議政公從文正公趙先生門生弟子
學朱子書公幼精敏能通百家游文純公李先生文
貞公曹先生門多所講問知朱子之爲正學而象山
陸氏之爲異端也二先生爲之驚服嘉靖三十有七
年舉文科權承文院副正字薦補承政院注書公自
陳年少不學乞去職退居讀書 明廟許之由奉常
寺主簿出監漣川縣四十一年遷弘文館副修撰初
文正公趙先生爲小人南袞所讒下獄賜歿 榮靖
王追復官爵而幽枉猶未昭雪庠序索然不復聞絃

誦之聲公因夜對言光祖百世之師也道德純粹庶
可興唐虞之治而孰知不測之讒萌於小人哉故至
治未興於上而黨錮先成於下臣竊悲之 榮靖王
愍其無罪而復其官甚盛德也然有司不贈上公不
賜榮謚非 殿下所以崇德象賢之意也 明廟怒
卽日貶監果川縣明年校檢承文院由兵刑二曹佐
郎充御史檢災關右入弘文館爲副校理遷吏曹佐
郎兼校書館校理漢學教授充書狀官朝 天子初
王守仁宗陸氏以觝朱子使天下學者靡然歸良知
之學 皇朝學士陸光祖尤好其說一朝叛朱子之

道尊信王氏之所爲書故 京師賢士大夫不入於
禪者幾希矣公慨然爲光祖言曰聖人之學本於性
釋氏之學本於心而王氏祖述釋氏此異端也學者
惡可叛朱子而歸異端乎光祖不從乃以爲古之所
謂聖人者能言其不傳之學爲天下師也 明有天
下二百年搢紳先生言道德者不可勝數而王氏獨
造精微乃能倡良知之學豈非所謂聖人者哉公益
憤切責光祖曰王氏之學以致良知爲宗旨其所謂
良知者只見其昭昭靈靈之體而已非孟子所謂仁
義之良知也然則王氏之所以自誤而誤人者不在

於致良知而在於所致之非良知也雖自以爲有功於孟氏而不自知其重得罪於聖人之門也朱夫子有言曰守虛靈之識而昧天理之真借儒者之言而文老佛之辭者此之謂也因極論人心道心之分天理人欲之辨光祖無以爲答方是時良知之學行於天下皇朝學士無不尊王氏之道而公反復以距之儒林相賀曰朱子之道不喪矣光祖亦謝曰子固豪傑之士也雖中國亦鮮有也及使還李文純公聞公所與光祖言者歎息不已隆慶元年公以吏曹正郎賜暇讀書入議政府爲檢詳遷拜舍人由司憲府

執義改副應教充御史檢災嶺南初金鎧最惡公等
十七人欲劾之廷中恟恟鄭公澈恚曰此金鎧謀陷
諸臣也卽求對言鎧奸邪安得不嫁禍 朝廷邪

昭敬曰鄭澈過矣鄭公進曰雷霆雖震臣言不可以
不盡因陳鎧姦邪之罪 昭敬大悟立黜鎧削其官
爵湖西饑公以司諫充御史往振之旣而復命擢典
翰遷直提學由司僕寺正入承政院爲同副承旨改
成均館大司成李文清公如 京師以公爲副明年
陞漢城府右尹出爲慶尚觀察使歲餘遷爲弘文館
副提學入司憲府爲大司憲出爲京畿觀察使初金

誠一嫉公甚發珍島守李銖米事以中之於是下銖
義禁府會珍島吏告銖船米置市人張世良所於是
又繫世良獄杖六百餘終不服金公繼輝言尹某

王朝賢士被

殿下知獎之恩竭忠志無大過惡而

誠一詆以受賕安知非宵人造言乎語甚切 昭敬

始知公冤狀

命釋李銖張世良承政院四啓固爭

昭敬怒免都承旨李山海等六人官視公如故明年
起拜江陵府使公以母老辭不赴未幾授開城府畱
守秩滿由左尹出爲黃海觀察使又以母老辭不赴
由大司諫遷吏曹參判居母憂服除以工曹參判兼

都摠府副摠管充奏請使

國系進資憲大夫判

刑曹改禮曹兼藝文館提學賜輸忠貢誠翼謨修紀
光國功臣號封海平君初金孝元與青陽君沈義謙
不相合朋黨始分而飛語稍稍媒孽宋言慎巡撫湖
南至羅州謂奇孝曾曰先王宮車晏駕沈黨意在
興寧君不在今上孝曾以聞昭敬疑義謙之附
興寧也心惡之不知其飛語之誣也公亦以義謙之
黨寢見疏不授銓衡加崇政爲議政府右贊成兼判
義禁府事鄭公澈安置江界坐削爵平秀吉叛從
車駕至平壤府承命乞師廣寧鎮還報義州行

在所起判工曹加輔國判中樞府事兼禮曹判書知
經筵事弘文館大提學藝文館大提學知春秋館成
均館事兵部侍郎宋應昌受 天子命爲經略充接
伴使入遼東初給事中魏學曾爲光海君謀易 王
位卽建議請分割屬國之半易置 國王事下兵部
石公星以爲不可應昌乃出學曾議示公曰朝議如
此汝國何以自謀邪吾且力保然汝歸告汝國 王
善爲之謀公流涕歸自遼東以學曾議上于朝 昭
敬歎曰予久知必有此變今果然矣乃召大臣柳成
龍賜酒曰卿才學無愧昔賢而事予不能有爲矣成

龍慙懼不能對然發告學曾之議以折光海逆謀者
公之力也進議政府左贊成二十五年秀吉復叛公
陪王妃在遂安聞車駕將幸南方乃上劄乞執
羈勒昭敬許之賜忠勤貞亮効節協策扈聖功
臣之號是時皇朝以王氏宜配孔子移王容事
下公卿公以爲王氏之學出於釋氏不可掩也烏得
與七十弟子從祀仲尼邪夫釋氏明心見性與儒家
盡心知性有相似者然釋氏有見於心無見於性今
王氏明心之學入於釋氏而不自知也嘉靖之世太
學士桂萼言王氏立異爲高觝朱子格物之說聚門

徒互相倡和請禁邪說以正人心萼非君子而猶能
知距王氏然則王氏不可以從祀仲尼也明矣且王
氏序古大學曰不務於誠意而徒以格物者謂之支
不事於格物而徒以誠意者謂之虛不本於致知而
徒以格物誠意者謂之妄於是去分章而復舊本其
得罪於聖人之門何如也孟子曰聖王不作諸侯放
恣處士橫議楊朱墨翟之言盈天下天下之言不歸
楊則歸墨楊氏爲我是無君也墨氏兼愛是無父也
無父無君是禽獸也嗚呼王氏與楊墨無以異焉幾
何其不爲禽獸也臣謂王氏不足以配食仲尼也乃

獻議沮其從祀 皇朝學士覽其議莫不竦動趙文
孝公曰先生今之孟子也三十四年入耆社議賜几
杖公固辭然後乃止後十年丙辰八月某甲以疾卒
于家享年八十計 聞輟朝二日謚曰文貞某月某
日禮葬于長湍臨江之原公爲人端雅英粹能下士
子諒愛物大學士許公國奉詔至境上見公容貌語
人曰誠嘉士也性廉潔老而無宅爲文章本原經術
而一埽荒服之陋反之西京純如也學者稱月汀先
生所著文集若干卷藏于家夫人曰豐壤趙氏節度
使安國之女生男六人女一人男長曰皖掌樂院僉

正次曰晁加平郡守次曰略次曰晞俱進士次日晁
次曰轍女適尹聞性庶子曰杲爲學官庶女適呂祉
吉琬子一人曰應之晁子四人曰擇之尚之悅之宗
之略子一人曰挺之方倭奴之陷平壤也公乞師九
渡遼水廣寧人觀公將幣皆歎曰尹大夫何其恭也
遼陽人觀公致命皆歎曰尹大夫何其勞也其後使
者入京師中朝人問公安否豈非以忠貞之節感
動中朝也哉余先大夫文貞公作號召檄數大臣
柳成龍罪流竄廢錮十餘年終不復爵公劄言廷或
正直爲柳成龍所中傷放斥江湖病且篤朝夕將歿

而其寃尚未昭晰乞降 明旨復其爵 昭敬不許
然公心篤於朋友先大夫賴公一言未瞑目得白其
寃恩至深也公既卒賢孫得觀爲其祖請銘于墓余
不忍辭乃爲之銘曰

天降文公昭我周行六經既正百家攸程如何子靜
良知是究淵源不猶千里之謬彼王氏子又侮羣聖
率心內求不見其性公初講學婺源斯尊祇服餘訓
如仰昆侖傳注之富能探其牘筆札之妙能得其畫
有斐陸君 中國之英曰聖人者其惟文成學士和
之胥倍先師公乃肅容以距詖辭餘姚之學不知性

命棄我誠明而歸慧淨武夷巖巖惟道之極邪說誣
民孰辨其惑鳩舌之徒日增月滋譬彼洪水莫之治
之吾雖末學曷不告誨辭氣益厲竦動海內人亦有
言今之孟子我銘幽堂垂千萬祀

奮忠贊謨立紀靖社功臣大匡輔國崇祿大夫
議政府右議政兼領經筵事監春秋館事新

豐府院君贈大匡輔國崇祿大夫議政府領

議政兼領經筵弘文館藝文館春秋館觀象

監事世子師文忠張公墓誌銘

并序

奮忠贊謨立紀靖社功臣大匡輔國崇祿大夫議政

府右議政兼領 經筵事監春秋館事新豐府院君
文忠張公葬于安山月巖之下公諱維字持國世稱
谿谷先生張氏出於回回國有舜龍者事蒙古爲宣
武將軍從齊國公主而來仕高麗官至門下贊成事
賜食邑于德水縣子孫遂爲德水人公曾大父任重
入 國朝爲掌隸院司議大父逸監木川縣父曰雲
翼判刑曹母貞敬夫人密陽朴氏漢城府判尹崇元
之女也夢旭日入于懷中遂生公公幼溫厚從文元
先生金公學儒術 昭敬王三十九年成進士光海
元年舉乙科權知承文副正字兼 世子侍講院說

書入藝文館爲檢閱遷承政院注書姦人申慄起誣
獄公妹恭人與其王舅承政院右承旨諱赫俱被逮
光海特命罷公職公乃屏居安山田里閉戶讀書爲
文辭是時光海叛 天子密教元帥姜弘立金景瑞
降于奴兒錮宮門幽 王大妃奪 神宗皇帝所賜
誥命別置禁兵以守之放元子璣於江華納諸炭室
而烘殺之淫虐無道荒亂已極公遂與金文忠公塗
洪文靖公瑞鳳李忠貞公厚源等受 大妃命廢光
海及 仁廟旣踐大位公復爲藝文檢閱陞典籍由
禮曹郎改吏曹 賜暇讀書入弘文館以御史廉察

湖南陞吏曹正郎加通政參知兵曹差備邊司副提
調李适叛以司諫院大司諫從 乘輿遂陞嘉善
賜奮忠贊謨立紀靖社功臣號封新豐君入司憲府
爲大司憲由成均館大司成進吏曹參判改弘文館
副提學天啓七年奴兒兵入平山府 仁廟出守江
華城奴兒遣使劉海等請和親 仁廟坐榻上不動
海勃然却立不肯前左右惶駭公進曰奴兒無禮請
麾海出去輟座海請絕 大明天子公憤曰 皇朝
之恩猶父母其可絕邪海以孔子稱管仲不死子糾
誘脅百端公乃舉孔子所謂人無信不立者以折之

海復歸正約既定請 王泣盟議者引唐宗渭橋事
謂當許之公請 王無聽且就海爭之甚力 王竟
使大臣主焉後海每見中國人必稱 王朝甚得體
巡撫御史袁崇煥亦謀知之每問 王朝使者曰張
侍郎今爲何官無聽否奴兒旣退使 王朝不書
大統年號公慨然曰和議之始凡奴兒欲使 王朝
絕 大明臣等雖死不可從一國臣民皆已知 聖
心堅定又何可先自沮畏以喪所守乎夫 天子表
正萬國必以年號爲之重今若差謬後雖悔必無及
矣 仁廟曰卿言是也遂特書 大明年號卒不改

崇禎元年公陞拜吏曹判書兼弘文館大提學藝文館大提學知成均館事邊塞人有爲奴兒所俘者亡歸本朝崔鳴吉內忌奴兒欲還之公上劄爭曰昔平原君一公子也身執於秦猶不肯出魏齊也況本朝以千乘之國爲奴兒棄我赤子而委之虎狼之口是可忍也孰不可忍也異日奴兒入邊境殿下何面目發號施令使人民提戈執矛以抗奴兒乎鳴吉不聽先是王朝請徙遼民兵部疑之仁廟命公具奏言子之有身無一髮非父母之遺也旣因父母而有此身雖因父母而捐其身有不敢辭臣之於

君何以異於此哉自古中國御外藩羈縻而已皇
朝之於臣國則不然自太祖皇帝以來覆露之恩
同於侯服及倭奴之難社稷爲墟神宗皇帝發天
下之兵傾府庫之財拯救而全安之五廟血食得不
墜者皆神宗皇帝之力也夫皇朝旣爲臣國續
垂亡之命而臣國不爲皇朝盡其職則狗彘不食
其餘矣臣雖無狀亦嘗聞先臣之遺訓矣嗣位以來
至誠享上不致以形虞勢危自變其忠貞之節也
伏惟陛下曲垂鑑諒使日月昭明之光畢燭無
外毅宗見其奏乃下詔曰君臣大義皎若日星

王忠蓋朕所監臨明年諫臣羅萬甲言事忤 旨流
遠方公論救之 仁廟怒貶羅州牧居一年召判刑
曹改禮曹兼大提學都督黃龍鎮東江爲其麾下所
縛辱東江大亂公承 命乃爲檄書諭東江曰總鎮
黃公受 明命掛印建牙來鎮東江此實 皇朝之
總帥全鎮之司命也雖戎政失其宜士心不附自
皇朝議其得失可也其在部下惟當守將卒分義而
已矣今者偏裨倡寇亂敢行無道執縛拘囚奪其印
綬掠其財賄雖大盜何以加此頃者總鎮以東江將
士乏食請易糧本國許發一萬七千石已令餉臣日

夜督運不謂總鎮遭肘腋不測之變當此之際如輸粟以餉亂衆是助逆而養姦也若皇朝責以正義則本國何辭而對乎今部下數萬人衆必有忼慨而搥腕思爲總鎮報仇者苟能昭明大義縛元惡傳示本國使逆順暴著遠邇則本國敢不敦好如舊乎不然則本國唯知遵皇命而致天討不忍與犯上之賊私相比周以亂皇朝之綱紀也檄至將士皆震懼復龍之位還其印綬龍以聞天子下詔獎其義九年奴兒圍南漢公從幸聞母夫人卒于江華乃歸葬安山明年仁廟命起復拜議政府右議政

公血泣上十八疏始許收還又明年戊寅三月十七日以疾卒于家享年五十有二方其卒時有晴虹橫亘屋上其光赤仁廟震悼賜吊祭輟朝三日贈大匡輔國崇祿大夫議政府領議政兼領經筵弘文館藝文館春秋館觀象監事世子師公爲人英粹和平早從文元金先生博學明辨金先生嘗曰持國見解雖古儒賢不能及也內行純茂事母夫人盡其孝與弟紳友愛甚篤紳坐法歿公終身自傷不能保其弟也妹恭人嘗被縲絏公見之慘怛欲死然光海放于江華諸功臣無不欣喜獨公自以舊史臣

送光海涕泣不已世稱公能不失赤子之心也公有文集三十卷其文章典雅通暢嘗自謂神情雖近步驟多違然本朝自韓山伯李文靖公始入中國學文章至崔立之所著書奇崛峻偉可傳於後世而終不如公之文平緩渾成也故金文簡公昌協嘗稱公叙事簡繁得當無斧鑿瑕類之累誠可爲東方大家也公娶金氏議政府右議政文忠公尚容之女謙恭愼畏以公貴封貞敬夫人生男一人女一人男曰善澂官至禮曹判書謚正莊女曰仁宣王妃孫男一人曰植官至郡守女二人長適議政府左議政李觀命

次適僉正金鎮瑞公少高明喜禪學其論中庸與朱子章句不同然文元每有所疑必與公往復辨解公論說如不經意而大義固昭晰也故文元輒舍已見而從之誠使公溺於異端則文元豈肯講問哉始光海時公之妹恭人被逮有孺子諱爾徵生纔四歲公愍其幼養于家賓客見之皆以謂此黃氏之孤也莫不流涕小子景源於恭人爲耳孫而諱爾徵玄孫也嘗得公家南華經愛公手澤未嘗一日釋卷也其後小子登文科爲弘文館大提學藝文館大提學踐公之位閱公之書而悲之乃銘于墓銘曰

修辭之妙維以行遠或淪於俗不能雅健文醜字陋
揆古多違或牽於法不能發揮事情濶疏與時相盪
執此兩端孰去其蔽允矣張公命世之材結髮操毫
名動八垓念昔歐陽爲宋文宗公承餘矩體裁雍容
溫然不厲渾然不窮步驟雖殊典刑則同其氣舒舒
其光猗猗能得古道不失時宜仁廟中興公尸文
柄旣長館閣遂秉國政赫赫毅宗實我父母公
尊天子如拱北斗乃作奏辭以告王心毅宗
獎諭曰朕鑑臨嗟余小子公妹之孫作此銘詩用志
墓門

嘉善大夫行承政院都承旨兼 經筵參贊官
春秋館修撰官藝文館直提學尚瑞院正 贈
資憲大夫吏曹判書兼知 經筵事弘文館大
提學藝文館大提學知春秋館成均館事貞僖

任公墓誌銘

并序

任氏世家豐川府正德中牧使諱尹由丙科進階通
政牧黃州 贈吏曹判書牧使生諱國老事 宣廟
擢判吏曹爲時名卿 贈領議政吏曹生諱守正卒
官弘文館校理以孝聞 贈吏曹判書公諱有後字
孝伯校理第三子也生四歲居父懷中能誦詩及旣

長師事族兄叔英天啓四年舉生員進士年二十登
第權知承文院副正字是時瀋陽數萬騎入平山使
劉興祚來請和親風 王朝無助 大明公以爲自
古和親不亡人國者未之有也且敵國欲使 王朝
毋助 中國豈不悖哉乃草疏盛言和親不可許是
時司憲府大司憲鄭文簡公蘊弘文館校理尹文正
公煌亦爭之 仁廟大悟遂却興祚公自此名重
王朝崇禎元年選拜承政院注書兼春秋館記事官
初弟之後被狂疾與朴同起李宗忠謀爲不軌居未
幾乃上飛變以自脫叔父禮曹判書蒙正弘文館副

提學就正皆坐繫公亦被逮 仁廟下教特釋之公
爲書與之後絕遂屏居蔚珍山中閉門不出由成均
館典籍拜居昌縣監辭不就七年出爲居山道察訪
已而棄去九年出爲高山道察訪又棄去冬瀋陽騎
圍南漢公率僧兵三百人馳至原州聞圍解遂還鄉
里十年虜人脅林慶業入東江明年又脅李時英將
入錦州公上疏曰慶業詐爲檄文誘島中因而縱兵
使島中盡爲魚肉然慶業崇墉列戟富貴自若也異
日屬國何以解四海之惑邪往者國相使瀋陽請止
徵兵而虜人未有明言臣固知 殿下寧爲亡國之

主必不忍於是事也然民心疑懼不定豈可不蚤正大義乎夫虜人之驩雖不可失而皇恩固不可忘也豺狼之怒雖可憂而昊天日月之臨亦可畏也匹夫絕交猶且有丁寧之言況三百年君臣之義豈可無一介使臣之上聞者邪臣以爲宜選使臣開道南海具奏羈縻事本末洞然無諱因慶業之首請命皇朝仁廟感動得妙香山僧獨步聘于皇朝後四年金文正公尚憲曹文忠公漢英亦論瀋陽徵兵事虜人不悅執兩人幽于瀋陽而公獨免自禮曹佐郎出爲慶尚道都事年四十九丁母淑人金氏

憂歠粥三年公自傷少孤未能服父喪母服旣除又爲父歠粥三年調榮川永川郡守仁同府使皆不就
是時孝廟好文學招延賢俊領中樞府事李文貞公敬輿上劄言任某文學宜居侍從於是自成均館
司藝掌樂院正入司憲府爲掌令固辭不就由左通禮出爲寧海府使坐事罷又二年由司導寺正出爲
江陵府使明年遷拜鍾城府使進階通政顯廟卽位召拜禮曹參議已而出爲潭陽府使又四年入承
政院爲同副承旨辭不就明年復拜同副承旨又辭
不就瀋陽譯者李日善張盖乘馬入闕庭公上疏

言曰善一俘卒爾以口舌得備衆胥與使臣固不同
矣而敖然張蓋乘馬敢入闕庭今之辱甚於南漢
然羣臣皆以謹事日善爲上策承望風旨惟恐不及
非所以尊王之義也顯廟褒納公平居喜讀周易
嘗以爲君者陽也臣者陰也中國者陽也戎狄者
陰也故其爲學尊君以正臣道尊中國以禦戎狄之
侮自立朝以來所建明者皆出是道云明年出爲清
風府使觀察使言公振民有惠政乃下教進階嘉
善又三年入爲工曹參判改兵曹是時吏曹選儒學
擬成均館大司成公以儒學在選中有不悅者引公

弟之後前事亟論之弘文館副提學李敏迪應教李
柙等上劄言任某節行甚高不當以之後之事中傷
之也明年召拜承政院都承旨公疾篤嘗上疏曰臣
聞鳥之將死其鳴也哀今臣疾病且死敢爲 殿下
一言而死近者六鎮改兵制非石畫也寧古塔習於
飛礮者以百數十年之間馴養滋多旣長於弓弩之
技而又精於飛礮此所謂虎而翼者也一朝有急鳴
鏑所嚮驟如風雨朝發白頭山下而夕已至於六鎮
矣况厚春也春之地百里而近使虜騎變詐出沒則
六鎮老弱嬰城彼其勢不降則走而已矣此北邊防

守之策有所失也臣臨歿言不知裁 顯廟嘉之明年擢拜京畿觀察使坐事繫獄及旣釋由戶曹參判出爲慶州府尹以明年癸丑十月十八日卒于官享年七十三某月某日葬于廣州龜川之原 賜弔祭賻恤其家後幾十年以公行義旌其閭 贈吏曹判書公氣剛履行清苦其事毋必敬而愉與諸兄友順慈和自之後陷於大惡雖引義而絕之然公終身內隱痛每中夜惻怛涕泣慙不能保其一弟也善爲吏廉簡愛民守鍾城時市旁州狼尾麝香以充貢獻而未嘗勞其民也在蔚珍教授諸生多所成就其後諸

生田九畹朱必大等或舉進士或及第皆公弟子也
及公卒蔚珍諸生爲建書院以祀之有萬休集四卷
藏于家公娶安東金氏三傑之女大司憲德龍之曾
孫也無子以公兄汝後仲子翊登爲後翊登生子二
人長道鼎次道晉女六人長適李壽俊次適許采次
適姜再烈次適柳渥次適趙泰果次適南泰有公庶
子泰登早死庶女爲尹世興妾銘曰

靜然後能昭其微方然後能端其義潔然後能全其
守直然後能守其志嗚呼任公四德旣成惟其獨立
君子之貞

折衝將軍忠清道兵馬節度使

贈崇祿大夫

議政府左贊成兼判義禁府事武愍黃公墓誌

銘

并序

故忠清道節度使崇祿大夫判中樞府事長水黃公

有玄孫曰進字明甫

昭敬王二十五年以忠清道

節度使能繼其祖將三軍秀吉之亂守晉州力戰歿之謚曰武愍夫晉州非湖西之地也武愍非嶺南之帥也而戰死嶺南之地者何哉蓋晉州矗石之城爲湖西咽喉之地秀吉先令圍晉州者將以入湖西之地也使公徒守湖西地而不守矗石之城則嶺南七

十二州必將陷矣雖欲保湖西之地其可得乎然則公之所以守晉州者爲湖西也其力戰歿於飛丸亦壯矣嗚呼惜哉公少舉武科出身補宣傳官丁母憂廬墓三年服旣闋出爲察訪居山道坐事罷從征北方斬首多以功遷爲安原堡權管久之復爲宣傳官始秀吉使玄蘇等來獻孔雀求和親本朝執政之臣建議許之乃遣使者黃允吉金誠一等浮海而行公從焉倭奴威脅諸使者無所不至諸使者恐懼不已獨公從容不少懾倭奴射侯誇其能令諸使者來觀之侯相去僅五十步公設的發無不中倭奴驚相

顧失色諸使者無不嗟歎有水鳥一汎于海一升于天公發矢輒皆中之及將還買二劍語人曰秀吉朝夕必渡海當以此劍擊斬矣初執政王和親遣使者報于秀吉而秀吉見使者時禮殊薄誠一大慙曰他日復命之時若直陳秀吉叛謀上聞 王朝則執政必以王和親得罪矣故牢諱秀吉叛謀而言於廷中曰秀吉實不謀叛 王朝深信其言而遂罷戎馬之備公憂之草疏將上其疏曰秀吉遣使求和親者欲假道而入遼陽也今執政許遣使者與秀吉約爲和親然誠一執政之黨也爲執政欺蔽 殿下遂以爲

秀吉假道非欲叛 中朝天子也實求和親也夫秀吉一狂虜也弑其國王源義藤遂自立爲大將軍又欲叛 中朝天子此所謂亂臣賊子也人得而誅之可矣然執政始爲秀吉諱其叛而誠一又爲執政欺殿下春秋之法討有罪先治黨與願 殿下斬誠一之頭以明春秋之法疏成宗族苦止之終不果上以光國原從功臣加宣略入濟用監爲主簿已而監同福縣縣有羸馬能馳騁高山峻嶺公知其可臨戰陣立買之養於縣廐每擐甲上挾仙樓以試其騎射之藝明年夏倭奴清正寇釜山直犯漢上公從湖南觀

察使李洸率師至水原伏兵沙橋左營將尹公安性見公軍不亡一鏃歎曰黃某真將軍也倭奴畱屯鎮安縣公與諸將守熊峙路遇倭奴卽射殺先鋒名將倭奴遂退以功拜訓練院判官其後倭僧和安師謂本朝迎慰使曰貴國兵能取勝者凡三處而熊峙大戰爲首黃家軍最可畏也已而倭奴犯全州公遂疾馳大破倭奴於安德院射中其酋而殪之自是倭奴不敢犯全州界矣居十日公守梨峴與麾下孔時億等誓死生晝夜警守觀察使令公直入倭奴軍探其形止公方梳承令將發夜將半聞馬蹄聲自錦山漸

近全州知倭奴已至境上卽擐甲督時億等迎擊之
中礮傷重而發矢終日不絕倭奴遁莫之敢戰公奮
擊盡戮無遺會飛丸中公之額公卽日還同福縣以
戰功入訓練院爲副正出守益山兼助防將節度使
宣居怡軍水原府禿城山公從之至于漢城與倭奴
戰于沙平爲所圍三日不還公匹馬潰圍而出倭奴
望見令其兵曰黃將軍宜生得之無放丸但圍其壁
倭奴以是不放丸公遂躍馬舞長劒斬倭奴首數十
級觀者股慄明年三月公以功授忠清道節度使鎮
于安城以拒之倭奴按兵不敢犯偃旗而歸公率師

追至尚州與倭奴戰于赤巖大破之湖南始定其六月公入晉州文烈公金千鎰兵凡三百忠毅公崔慶會兵凡五百孝烈公高從厚兵凡四百忠毅公張潤兵凡三百相繼而至公亦以精兵七百同日來會軍中推公爲大將而潤爲副時倭奴百餘騎出沒於東北山上明日又出五百騎陣于北山已而羣酋又繼至分爲二隊其一隊屯于山阿其一隊屯于路衢公交戰斬首甚多倭奴懼棄甲而走戌時復進大戰良久至亥時然後始退子時復進終宵戰寅時乃退潤以爲城南矗石地最嶮倭奴軍必不敢犯惟西北可

以鑿濠也公從其言輒浚渠而爲之潢儲水其中倭
奴鑿之爲大路明日清正又大戰聲震天地公乃令
弓弩之士亂射之矢下如雨已而倭奴數萬人至東
門外築土室俯視城中公立脫玄冑錦袍負土石對
築高丘城中人感激流涕以助之一夜而成於是將
士放飛礮破其土室明日清正作大匱以牛馬皮裹
其上各自負戴以攻城公令將士下大石而搗之倭
奴遂退卽以書投于城中曰 明兵今已來降汝敢
守三里之城而欲拒百萬之師乎公乃爲書以答之
曰一國忠志之士竭力而固守者唯知戰歿而已矣

况 明天子命大將軍李如松率五萬軍破爾兵於
牡丹峰下者乎倭奴大怒築五阜結竹爲柵以臨之
已而又作四輪車令數十人被金甲牽車而進以鐵
錐鑿城四面城中人束火灌油而投之倭奴燒死夜
清正潛師鑿城城中人皆殊歿戰倭奴歿者以萬數
公方臨戰有倭奴潛伏城下以擲丸橫中木版公左
額亦爲飛丸所中遂卒萬曆二十有一年癸巳六月
二十有八日也享年四十有四明日城陷軍民歿者
六萬人千鎰慶會從厚亦投矗石樓下而歿公家人
尋公之屍以其年七月十日歸葬南原楓山之原

昭敬王賜祭旌閭 贈崇祿大夫議政府左贊成兼
判義禁府事復其家錄用子孫建旌忠彰烈二祠與
千鎰慶會並享之初忠翼公郭再祐爲公言曰公湖
西節度使也且無 君命雖不入晉州可也公謝曰
進守晉州無以異於守湖西也况與人約以共守豈
可臨難而背其約乎忠翼公爲之太息因酌酒與公
而訣公爲人嚴重魁偉鬚髯若神事父母能致其孝
與其兄篤於友愛兄蒙難下全州獄公自同福徒步
夜行二百里未明而至見觀察使解其難又愛人勇
於急難雖裘馬有所不惜公旣卒其所乘馬過公墓

悲嘶躑躅良久而去人皆異之初秀吉兵入釜山

昭敬王命金吾郎逮誠一將誅之於是執政力救之
薦爲慶尚左道觀察使嗚呼人臣欺君其罪當歿而
誠一上欺王朝乃反受觀察之命往禦之然倭奴
踰嶺長驅入王都宗廟爲墟二陵灰燼是誰
之罪也使公疏登聞王朝則誠一雖不可得而誅
之然昭敬王必修武備而不出居於義州之城矣
有如秀吉得公之疏而讀之則豈不知王朝之有
人乎黃氏出於侍中瓊子孫遂爲長水人莊憲王
時翼成公諱喜擢議政府領議政與文敬公許稠配

享 廟庭有三子長曰致身卽崇祿判中樞府事公
之高祖也曾祖諱事孝司憲府大司憲謚曰良靖祖
諱塏 贈工曹參議父諱允恭 贈議政府左議政
母 贈貞敬夫人房氏義盈庫奉事應星之女也公
夫人晉州蘇氏有婦德後公三十三年卒附于公墓
子三人長廷稷判官次廷說縣令縣令之孫燁中等
以尤菴宋文正公時烈之狀屬景源銘公之墓景源
於公爲族孫義不敢辭遂爲之銘其銘曰

黃於 王家世篤忠貞自我翼成惟德之閔至于孝
孫良靖嗣興公承厥緒禦侮是能勇則超乘氣則蓋

世蠻奴構兵覬國疲敝踔海萬里錦帆如雲先屠萊
府遂犯晉軍矗石嵯峨其圍三匝公臨白刃飛礮交
集乃浚長渠以儲壕水羣醜決之俾通車軌公築高
陵而破土室雕題相望莫不震慄有梯十丈上設板
屋公亦出奇悉逐并服有車四輪中置木匱公又束
草延燒兵器孰知流丸中公之額三軍號哭巖谷崩
埤楓山之原衣履所藏博士作銘以識幽堂

明總兵官朝鮮國輔國崇祿大夫三道水軍統
制使兼慶尚右道水軍節度使忠毅鄭公墓誌

銘

并序

天啓二年二月甲午有明禦倭總兵官朝鮮國輔
國崇祿大夫三道水軍統制使兼慶尚右道水軍節
度使鄭公卒于軍四月戊辰葬尚州沙伐之原公諱
起龍字景雲昆陽人也曾祖哲碩贈嘉善大夫戶
曹參判兼同知義禁府事祖義傑贈資憲大夫戶
曹判書兼知義禁府事父浩贈崇祿大夫議政府
左贊成兼判義禁府事公初諱茂壽神宗皇帝十
四年中武科第昭敬王夢神龍起自鐘樓飛昇于
天乃遣內臣往視之會公獨至鐘樓下倚柱而立內
臣還報即召入見其容貌大異之遂賜今名補展

力副尉訓練院奉事二十年平秀吉叛從防禦使趙公倣率師往討倣踰嶺聞倭奴兵已薄嶺下乃以公爲前鋒將至牛旨倭奴前鋒五百人屯于新倉公單騎馳入陳中擊殺倭奴百餘人倭奴披靡皆遁去有酋四人持利劔伏叢薄中公旣行劔及其背卽抽矢射殺三人其一人棄劔而走公由是名聞國中倭奴兵屯潛水橋倣畱軍不敢與戰公獨與壯士八人復踰牛旨破倭奴於三峰山下夜倭奴謀襲公軍公不動天明躍馬超高墻倭奴合兵以圍之公復躍馬潰其圍斬倭奴首懸于馬鞍至山上已而倭奴躡公後

圍之數重公乃折橡木爲椎搏擊之倭奴顱骨皆破
碎死者甚衆公旣潰圍倭奴悉兵又追之公乃擲椎
引弓背射殺倭奴不可勝數倭奴遂遁夏五月倣以
其衆退屯金山秋豐驛倭奴潛師亟攻之公率精兵
先登力戰斬倭奴五十餘級戰方酣倭奴執倣欲殺
之公卽拔劒入中堅大呼倭奴無殺我賢防禦使倭
奴怒遂搯倣吭將下刃公已躍馬斬倭奴奪倣而歸
倭奴望見莫敢犯是時公母金夫人在智異山公辭
倣入智異山金夫人爲公語曰 王室危急汝趣行
不可濡滯公涕泣受命以行至昆陽昆陽太守李光

岳將赴晉州卽差公爲守城將令保昆陽招諭使金誠一召至晉州又差公爲游兵將尚州判官權公吉戰歿北川及誠一爲觀察使卽日啓公攝判官保金烏山是時倭奴陷尚州或據山陽或據中牟或據化寧殺掠人民文莊公鄭經世與州人金光斗康應哲等率鄉兵疾戰敗績牧使金澥提其民入龍華洞倭奴間行將屠之公至谷口見倭奴已被山矣然地險不可馳擊乃爲優人卽馬上劃然長嘯或立或卧或隱或見倭奴相顧稱其能欲生得之追公甚急公偃旗且奔且止誘倭奴出於平原然後建旗疾擊之倭

奴大敗走州下僵屍縱橫七十里州人老弱皆得全
無一傷者未幾倭奴自中牟趨化寧公設石車以待
之倭奴旣至石乃發歿傷甚多公乘勝斬三百級倭
奴猶據州城中一月不出公發州民四百人屯于西
亭約以束火攻倭奴三門置將惟東門不陳一兵選
壯士伏于城東栗林中夜半吹角以爲號四百人同
時燃火自西亭入倭奴營焚其廬舍倭奴驚奔走避
火果從東門遁山中栗林伏兵逆擊之斬四百級遂
復尚州十二月與倡義軍擊倭奴於唐橋下斬二百
級倭奴退屯大乘山公又追擊大破之令壯士李希

春等數十人分守險阻遇倭奴輒狙擊之斬一千級
已而又斬一千級倭奴相戒不敢近明年五月授中
訓大夫軍資監副正陞實判官秋 皇朝游擊將軍
吳惟忠駐師尚州公攝牧使十一月陞實牧使兼敢
死軍大將又明年加通政大夫兼討捕使二十五年
夏六月秀吉復叛李文忠公元翼體察南方至尚州
與都元帥權忠莊公慄防禦使郭忠翼公再祐議却
賊之策各舉大將衆皆曰非鄭某不可會 皇朝游
擊將軍茅國器見公容貌謂元翼曰鄭某有戰勝相
元翼喜下令趣召是時星州牧使李守一與公城守

金烏山公欲赴召而守一終不開門以送之元翼歎
曰鄭某不至則社稷其將危矣卽策馬躬自迎之
公感激以歿自誓遂趣行至泰馬原與元翼遇於道
中公下馬元翼望見亦下馬班草而坐與之論禦倭
之事公爲陳方略甚悉元翼於是授大將以二十八
州兵馬付公曰明日願見捷書公對曰謹當如公之
令卽日進軍綠檀田遣斥候將李希春等夜擊倭奴
於竹田中斬一百級是時倭奴屯赤林臨龍潭水而
公軍在於水西與倭奴隔水相對進退不便公欲使
三軍渡水然後乃擊之預遣安東稜挺軍伏於藪中

公先登與倭奴戰佯敗走至理同嶺倭奴悉衆而追之公乃反旗殊死戰有一將軍朱衣白馬立旗前驚勇善戰倭奴遂推爲元帥至平原立拔長劔迴閃之飄飄直前與公交鋒不二合公自馬上生擒朱衣白馬者挾于掖下而馳騁之朱衣倒垂而白馬猶在後也其手中雖有長劔莫能用倭奴大敗公於是遂縛朱衣白馬者懸於旗上倭奴望見皆震懾莫敢逆戰公縱兵奮躍而進頃之安東稜挺軍出於藪中左右夾擊斬一萬二千餘級倭奴中矢死傷者又過半矣及戰罷三軍所斬倭奴首積平原中如夏屋者且五

六不能盡輸唯割左耳而載者又數四馬公既獻馘于元翼又俘朱衣白馬者以獻之元翼拊髀曰鄭某百戰百勝真名將也茅游擊善相人矣是時晉州節度使金應瑞兵敗坐黜元翼啓公攝行節度使事鎮星州倭奴清正聞公生擒朱衣白馬者望風而遁自嶺以西五百里奄然復定公之功也初元翼躬自迎公也諸從事內懷不悅及公既至秦馬原遇諸從事不爲禮諸從事恚見元翼而詆之元翼曰公等無嗔禦賊行師烏可責其小禮乎後三日公上捷書諸從事無不慙服九月特授左道兵馬節度使趣命

視師是時 皇朝大將軍麻公貴與都御史楊公鎬
擊清正於嶺南十一月公率精兵赴慶州中國將士
從征者十四萬人見公治軍極簡易傷者撫之病者
摩之謂公麾下曰中國將士若得公爲大將軍孰不
爲公歿戰也十二月公至慶州從大將軍當右營清
正直犯大將軍公引所部兵三千先登力戰大破之
斬八百級清正懼棄城夜遁公追擊至富平驛又破
之遂復慶州居未幾大將軍貴至蔚山距清正營六
十里公引輕騎與游擊將軍擺賽爲先鋒遇倭奴力
戰破之斬四百五十餘級遂圍島山清正晝夜堅城

守大將軍貴心憂之乃令茅國器爲先鋒公又從征
斬六百六十餘級明年春大將軍貴還慶州獨公力
戰猶不反清正出城悉引兵圍公四匝公拔劍大呼
清正孰敢與起龍交鋒乎卽躍馬潰圍而出清正望
之戒其衆曰此豈非敢死軍邪爾無輕犯由是倭奴
皆震懼不敢追之初 皇朝總兵李稅率麾下軍擊
倭奴于沙斤驛公從征斬二百級已而總兵中丸死
麾下軍七百餘人詣大將軍叩頭言曰稅已死願屬
鄭某以禦倭大將軍具奏以聞公於是名動天下
詔以公爲總兵官 制曰禦倭總兵官李稅戰死麾

下軍願屬鄭某其命某領稅之軍中國人相與嗟歎
曰鄭某拔自外國受 帝命爲總兵官此前世之所
未有也公旣受 詔大將軍貴爲公賀曰倭奴蠶食
屬國總兵官獎率三軍捍國難勇敢有謀使屬國文
武諸臣皆如總兵則倭奴固不足平也爲致禮幣及
弓矢以示優禮都御史鎬亦爲公賀曰總兵忠勇可
嘉爲致花幣以示鎬獎勸之意九月公從大將軍董
一元至星州固請進兵大將軍感公之誠令諸將趣
之晉州公先登雞鳴渡江未明直趣望晉峰擊石曼
子大破之遂復晉州倭奴平辭節度使還田里二十

九年陞嘉善由金海密陽二府守清道郡兼防禦使
遷拜左道節度使改全羅道節度使四十五年薦授
三道統制使以疾卒享年六十一公爲人魁偉威猛
善騎射身長七尺目炯炯夜見毫毛聲若洪鐘每長
嘯能聞十里自少時慷慨從軍凡七年身冒矢石百
餘戰未嘗敗北嘗與清正戰于島山有飛丸穿其頭
髻而膚體一無所傷人皆驚喜以爲神所殺倭奴以
萬數倭奴至今畏其威小兒啼輒呼公名以止之公
初配 贈貞敬夫人晉州姜氏某官世弼之女晉州
陷破指出血書其衫以遺于公遂投江而死無子公

繼配貞敬夫人醴泉權氏弘啓之女生子四人女二人子長曰翼麟出身次曰得麟亦出身次曰德麟次曰時麟女長適生員金是稅次適朴彥柵公事母以至孝聞兄仁龍有子祥麟幼而孤秀吉之亂爲所俘公入千金竟贖之初大將軍戰于竹島八將軍環島而陳平行長冒歿直衝八將軍敗還晉州獨公將士無一人死傷者大將軍歎曰李稅麾下七百人能得其帥矣至今上時謚曰忠毅銘曰赫赫忠毅天子干城旣智且勇又威而明島夷初叛公從軍旅平原躍馬奪我防禦使相親逆公遇草

萊中丘反旗腋彼渠魁維時大邦亦服德音矯矯
六師莫不歸心哀茲李公死于沙驛乞屬麾下其軍
七百乃降璽書獎公之忠曰汝起龍濯征有功都
督揚之經理舉之匪朕私之而衆所推爰授總兵俾
訖天誅公拜受命遂平倭奴制誥在函榮踰鐵
券禮幣在筐光動戎陣畀此統鎮豈酬驅馳焯于幽
宮惟有銘詩

弘文館校理承議郎知製教兼經筵侍讀

官春秋館記注官周公墓誌銘

并序

陝川郡東江之陽有亭曰浩然故弘文館校理周公

講論之所也公以儒者仕 王朝爲名學士而一日
棄官以歸其所居松壇竹塢杏渚釣磯揖仙之臺聽
琴之榭至今猶存故學者每過其下彷徨太息而不
能去云公諱怡字士安尚州人也五世祖瑜王氏時
始舉進士及國亡屏居不仕曾祖長孫 贈兵曹參
議祖文佐成均生員游海平金孟性門知名於世父
世龜 贈副司果母曰崔氏貞烈公潤德之女也公
幼精敏彊學明辨從叔父副提學世鵬曰吾家底柱
也嘉靖二十五年舉丙科由承文院副正字遷成均
館典籍歷清洪道都事兼春秋館記注官薦入吏曹

爲佐郎三十年充書狀官朝 京師 世宗皇帝出
盆松 詔公賦詩是時 皇朝士大夫言事得罪者
甚衆公所爲詩稱孤松直不見容以諷之 天子感
動其後使者至 京師 天子必問直不容先生無
恙否於是 皇朝諸學士皆稱公爲直不容先生故
直不容先生之名聞於天下及歸出監禮安縣歲餘
棄去歸老於東江之陽 王朝徵拜弘文館校理終
不就 明廟之際副學公閒居丘園與退溪李先生
滉月川趙先生穆修明道德而公日從二先生講論
仁義之學力行不怠副學公爲之驚服二先生亦未

嘗不稱公之賢也四十三年甲子七月十六日以病卒于家享年五十某月某日葬于郡東命崑原公爲人純信端厚事父母能盡其孝母疾革嘗禱于天請以身代其居憂廬墓三年與人處誠心藹然故鄉里無不慕重其配曰宜人星山李氏察訪希男之女某年某月某日卒附于公墓公無子以從兄某子嗣宗爲後 贈僉正女二人長適申景軫次適李天慶僉正有子五人曰慶胤武舉出身曰吉胤曰賀胤營將曰喜胤教授曰貴胤直長女一人適李弘皂庶子祉胤亦武舉始 明廟時公年未老而退居江湖之間

絃歌俯仰以自娛徵之不起豈公詩所謂直不容者
邪銘曰

余嘗悲孤松之拳曲兮不得上戾于星辰根茂翫而
相繚兮枝擁腫而不伸公之志亦類乎是兮內懷諒
直而莫能申方獻詩於天子之宮兮海內知其忠
純哀此邦之難容兮遂翳藏於江之濱有崔其阿兮
有幽其渚嗚呼公之休聲兮尚永詒於後人

權知承文院副正字奉直郎 贈通訓大夫司

諫院司諫兼春秋館編修官黃公墓誌銘

并序

公諱奭字存畏其先長水人也六世祖議政府領議

政諱喜事

莊憲王爲賢相配享

莊憲廟庭謚曰

翼成曾祖諱起峻造紙署別提

贈議政府左贊成

祖諱悅掌樂正

贈領議政掌樂正有二子長曰廷

式吏曹參議

贈吏曹參判次日廷或兵曹判書兼

大提學策光國一等功臣封長溪君

贈領議政謚

曰文貞參議無子公以文貞第二子出爲參議后萬

曆二十年平秀吉叛文貞公從王子珪入北方至

會寧府爲倭奴清正所俘公伯氏戶曹參議諱赫與

公就虜授以刀使相刺死公將刺手不能舉因泫然

泣下數行守者於是奪其刀縛之益堅明年清正踰

鳥嶺以公父子至密陽蒙

神宗皇帝詔諭秀吉乃

得歸會參議公卒于平壤公中道奔喪及服除舉生
員至光海時舉丙科隸成均館爲學諭已而改承文
正字明年四月公伯氏與其孫死於獄中公亦被逮
減死安置鍾城府久之量移興陽縣天啓元年六月
十四日卒于興陽享年五十三某年某月某日葬于
坡州長水山金蠅之原 仁廟靖社 贈通訓大夫
司諫院司諫兼春秋館編修官配 贈淑人驪州李
氏判官諱緇女吏曹參判審之後也生子一人曰坤
載進士有文章早卒 贈承政院左承旨女二人長

適李性恒司憲府執義次適金益烈承旨生子一人
曰裒全州判官 贈吏曹參判參判有子三人女三
人子長曰爾中次曰爾明進士蔭仕至府使次曰爾
章禮曹參判女長適李義著次適金尚鉉知事次適
任弘望知事公少簡嚴承旨公以至行聞而有過不
少假借或待罪寢門之外怒止而後始歸次家法之
嚴類如此公父子工於文章崔立之年長於公而相
得遂爲知己與李安訥友善自公兄弟遭禍釁世皆
疎之獨安訥不廢問訊往往賦詩投棘中也公旣卒
之幾年幽冤雖伸而德美不顯於世五世孫正郎處

浩錄公之行屬余爲誌惟文貞公當昭敬極盛之時執文柄功名蓋世而公兄弟以文貞之子登高科翱翔於朝然家覆兄歿桎梏弟流嶺海豈不悲哉正郎能集公事於百年之後求銘于墓可謂孝矣銘曰

榆山嵯峨今畧浦瀾瀾招公之魂今我心孔悲猗彼倭奴今爲虎爲貔執公兄弟今猶不殲之如何愴人兮跼公于危幽之犴獄今木索纍纍自彼朔方遷于南垂橘林蒼蒼山鬼與隨鴻鴈北歸今靡不羽儀公胡不返今網羅于罹惟原窈深兮魂其來斯兄孫永

傷今作此銘詩

徵士故朝散大夫冰庫別坐蔡公墓誌銘

并序

公諱得沂字詠而姓蔡氏仁川人也高祖諱壽官至
禮曹參判兼弘文館提學謚曰襄靖曾祖諱紹權官
至刑曹判書祖諱無已官至軍資監正父諱有終官
至直長母曰固城李氏牧使龜壽女也公少好學有
高節崇禎中屏居尚州無知山不應貢舉 王朝徵
授冰庫別坐辭不就初 孝廟爲大君時與 昭顯
世子質于瀋陽 王朝求忠信之士令往護之公以
白衣在選中 仁廟下教敦召之又辭不起由是坐

配報恩縣三年始釋觀察使趣公北行公詣闕上
疏固辭仁廟獎諭因命強赴公感激卽日就途至
瀋陽孝廟甚喜日賦詩與相唱酬以爲樂是時清
人入關門圍京師海內遂震孝廟感憤有掃清
瀋陽匡扶帝室之志公朝夕常侍左右論天下事
孝廟大悅嘗從獵至女奚部鑿冰丈餘飲其水獨與
公俱爲解錦裘以賜之恩遇甚隆昭顯世子嘗
爲詩思古劒客公和進因言少康有衆一旅而能復
大禹之績光武不階尺土而能恢高祖之業此無他
立志之堅也晉之元帝宋之高宗以天下之衆不能

灑中國之辱此無他立志不堅故也然不密則害生
燕丹不勝一朝之忿卒以亡國今虜勢方盛豈一劒
客所可圖也宜勵志以俟其時 世子稱善明年六
月公從還 孝廟謂公曰子之才智雖張子房諸葛
孔明不能過也欲請於朝而官之公辭曰昔李泌爲
帝王友而不願仕也如蒙不棄惟得處帷幄足矣遂
歸鄉里卒不仕雩潭在尚州洛江之上玉柱峰下有
江山巖石之勝公治亭以居之 孝廟手書問起居
因 命畫師圖進其所居山水勸公入都公又辭以
不敢私交 孝廟由是知其志不强致焉公少與杜

谷處士洪君宇定相友善 明仁宇定亦不仕隱居
太白山中數與公徒步往還公嘗夜被隱者服坐臺
上彈琴而歌未嘗不慷慨悲憤往往乘舟浮大江溯
流上下嶺南人至今稱公爲高士也未幾遇疾以丙
戌四月二十二日卒于家享年四十三某月某日葬
于州西幕谷之原 孝廟冊爲 王世子聞公卒爲
之悼傷遣使者 賜祭致賻公爲人剛介清謹事父
母以至孝聞慎交游見人之不善不與之語人畏之
輒相戒曰爲不善無令某知也公於書博學強記自
天文至醫藥卜筮兵陣之書無不神解清人圍南漢

公夜觀天象大驚曰主上必下城矣已而果然公娶靈山辛氏某之女公入瀋陽時未有子取從祖兄某子克哲爲後公少有志於天下當明室傾覆之際從孝廟驅馳遼瀋慨然以謀臣自許及孝廟卽位公已卒不得與議天下事豈不惜哉銘曰鑿玄冰兮丈餘從孝廟兮奚之徼孝廟東歸兮命還夫漁釣洛水之汜兮白雲淒淒舟以爲家兮無東無西使者來聘兮泝洄雲谿山川雖可繪畫兮莫知夫子之所棲

江漢集卷之十六目錄

墓誌銘

大匡輔國崇祿大夫議政府領議政兼領經

筵弘文館藝文館春秋館觀象監事世子

師文簡李公墓誌銘

并序

贈朝奉大夫弘文館正字兼經筵典經春秋

館記事官李君墓誌銘

并序

通訓大夫司諫院獻納兼春秋館記注官蔡公

墓誌銘

并序

通政大夫刑曹參議魏公墓誌銘

并序

贈通政大夫承政院左承旨兼經筵參贊官

黃公墓誌銘

并序

嘉善大夫咸鏡道觀察使兼兵馬水軍節度使

巡察使咸興府尹黃公墓誌銘

并序

興祿大夫東陽君墓誌銘

并序

處士權公墓誌銘

并序

通訓大夫清州牧使清州鎮節制使安公墓誌

銘

并序

進士李公墓誌銘

并序

通訓大夫和順縣監羅州鎮管兵馬節制都尉

沈公墓誌銘

并序

通訓大夫唐津縣監洪州鎮管兵馬節制都尉

宋公墓誌銘

并序

通訓大夫三登縣令成川鎮管兵馬節制都尉

張君墓誌銘

并序

處士李公墓誌銘

并序

處士李公墓誌銘

并序

李毅父墓誌銘

并序

江清集卷十六

二
一

江漢集卷之十六

墓誌銘

大匡輔國崇祿大夫議政府領議政兼領經
筵弘文館藝文館春秋館觀象監事世子師

文簡李公墓誌銘

并序

大匡輔國崇祿大夫議政府領議政兼領經筵弘
文館藝文館春秋館觀象監事世子師李公墓在
富平府下梧亭高里之原公諱天輔字宜叔其先延
安人也曾祖諱嘉相舉及第以孝歿之贈弘文館
修撰祖諱重朝以禮曹判書文肅公諱一相子爲修

撰後 贈左贊成父諱舟臣沃川郡守以司僕寺僉
正諱成朝子爲贊成後 贈領議政公家世皆能文
章自文忠公諱廷龜文靖公諱明漢至文肅公仍三
世爲大提學而公母夫人光州金氏文忠公諱萬基
之女文清公諱鎮圭之弟也文清公父子相繼執文
柄以名論聞嘗稱公曰真英才也公少卓犖有大志
不好讀書及旣長能自折節爲文章名論最高卿大
夫聞公之風造其門者甚衆雖時俗異趣之士一見
其面以爲榮故公自其少賤時名重當世初舉生員
補內侍教官年四十二中乙科拜侍講院兼說書明

年選入弘文館爲正字纔三月遷副修撰又明年轉侍講院司書司諫院正言爲文學吏曹正郎遂拜校理兼東學漢學教授改司諫院獻納兼校書館校理明年正月以兼司書充御史案沃川獄入爲修撰副校理兼文學九月遷成均館司藝司憲府掌令十二月以司僕寺正兼弼善已而選爲副應教明年春轉侍講院輔德改司諫院司諫司憲府執義兼輔德又明年冊世子嬪以都廳勞擢承政院同副承旨二月改司諫院大司諫參知兵曹九月遷成均館大司成又明年兼承文院副提調由掌隸院判決事移兵

曹禮曹參議明年二月出爲黃海觀察使城海州歲餘召爲副提學以城事仍觀察使又明年城成復爲副提學閏七月授吏曹參議坐事斥守古阜郡未行擢吏曹參判兼同知義禁府事藝文館提學世子右副賓客明年免由刑曹參判復入吏曹爲參判兼同知經筵事備邊司有司提調明年二月擢判兵曹知義禁府事十二月移判吏曹後明年復判兵曹夏六月進議政府右議政纔五月轉左議政未盡三年拜領議政公爲人開廓簡平能虛心勇於遷善爲政寬大不喜更張其臨事思慮高遠能見人之所不

能見嘗與人言曰李天紀等一二人以布衣與贊大策立功績然其所處與諸大臣不同矣已而大悟曰獄一也士之死者何以異於大臣之死者邪其爲修撰上疏言一二人如納於逆則其獄猶有所不誣也或讓公曰議論何變之遽也公謝曰吾求其是而已矣初朝廷燒睦虎龍誣告書而國史猶未改修公以獻納上疏曰大義伸於一時而不載史冊之中則後世何所考焉自古實錄或正其謬或補其闕所以重實錄也宜開局別爲一錄藏之石室言雖不行而廷中皆服其識公嘗謂往者國是未定也士大夫

棲遲農畝而不肯仕義當然也今國是既定於上士大夫皆可仕也而用人曾不廣焉適足以養一淫朋也及入吏曹爲參議具疏論之或曰廣之則小人雜進奈何公愀然曰人之任職其惡著然後錮之安能以未著之惡先錮其人哉君子之心不如是爾其後公所舉擬者爲李光佐趙泰億擅停國論於是錮之一不擬侍從之職趙顯命建均役議上命公三月直宿備邊司指畫條目遣均稅使權江海魚鹽之利公上書曰自古征利何嘗不自魚鹽始乎臣恐不出十餘年聚斂之臣左右并進而國家受其病矣由

是朝廷不復委公以均役事矣公爲相務持大體
未嘗以好惡恩怨存於心少時與故大提學趙公觀
彬不相能及趙公論和敬淑嬪竹冊事上盛怒
將親鞫之大臣召見涵仁亭上顧公曰卿爲予作
竹冊文公曰觀彬過於謹慎匪以竹冊爲不可也今
殿下以竹冊文命於臣臣何敢辭上意稍解公又
言觀彬無罪年又老不當施刑上曰竹冊事急卿
可退公曰殿下不許觀彬免於刑臣不敢退上
曰予當爲卿不施刑豈欺卿邪由是趙公免於刑然
謗公者反謂公激上之怒公大笑終不自辨初高

大成以異姓從叔之女爲公妾而公之婢大成妻也
後大成坐盜祭器歾捕廳未幾持平趙宗溥劾公幽
殺姜氏子而奪其妻 上命刑曹案其事刑曹啓言
某妾實非大成妻而大成亦非姜氏是時修撰趙榮
順詆公益力以大成事爲黜昧并劾公從兄鼎輔從
弟益輔公上疏請覆案之 上諭曰此獄非姜而高
非夫而戚何以問乎雖然卿心可諒矣乃 命刑曹
覆案之其事旣白公上疏乞免相職終 不許明年
上遣都承旨特召之公入見乞免益懇 上許之其
後賓客言榮順詆公時事公笑曰吾已忘之矣然

治朝豈宜錮棄趙修撰邪及上殿請用榮順聞者
嗟歎始知公有大臣量公在上前不面諛於名論
侃侃自守雖得罪終不能屈也吳瓚上書論國誣
上如懿陵叩頭而泣曰予誣未雪則不還矣公流
涕固請還都倉卒失辭而不自知及上旣還遂
自引上怒曰大臣自引廷中必有誹謗者乃下
教索誹謗者或以謂公不直陳非事君無隱之義也
公正色曰吾爲大臣其可告誹謗者邪卒不告上
不得已罷公職始上追尊毓祥宮封昭寧園
議者曰禮當告廟公曰嗣王以私親追尊之

禮告于太廟吾未之聞也遂不上請 上大怒曰
國有典禮而大臣不請告 廟此其心欲譁其事也
乃罷公職初 上以事久不怡嘗幸 孝章世子廟
公請進見 怒不許戒中貴人閉宮門無納羣臣公
排門直入宮庭中貴人遮公語曰有 教無納羣臣
雖相公亦不可入公瞋目叱中貴人曰大臣進見中
貴人其可拒邪 上在帷中望見之 下教曰大臣
不待君命而入宮門甚不敬也公泣曰自古人君使
宦官深鎖宮門固拒大臣而國不亡者未之有也
上大怒立罷公職已而寢爲遣近臣敦召之 下教

曰予將躬臨公終不就 命削黜未盡一月輒復拜
爲左議政初金相度李彥衡言事得罪公上劄曰赤
子饑饉於下而災異數見於上然今日罪一言者明
日罪一言者數日之間言者得罪相隨屬甚非 殿
下所以遇災驚懼之道也 上怒曰大臣上劄論救
黨人而欲自脫焉烏在其爲股肱也乃罷公職 下
教削黜旣七日叙拜領敦寧府事數月復爲領議政
固辭不就會 貞聖王妃徐氏與 仁元王妃金氏
相繼而薨公爲 山陵總護使詣 山陵疾篤遂免
明年八月 上不怡中外憂懼不知所出公以爲吾

不造朝無以安中外之情卽扶病入見 便殿 上
問其病 命中貴人護上殿公泣曰 社稷存亡之
機在於民心民心一散則 社稷雖欲不亡不可得
也今 殿下不怡日久民心皇皇如是而 社稷不
亡誠難矣逆家親屬怨國者不可勝數安知其不扇
亂也 上益不怡乃 下教罷公之職未幾召判中
樞府明年復爲領議政 上旣禪有司求對引故事
請冊 繼妃公以病不與有司偕上 殿遂坐罷職
公旣退作六化亭於江上與賓客逍遙自適居未幾
召拜領中樞府事其明年公病益篤 上遣太醫往

視之賜藥存問以今年辛巳正月乙巳卒于家享年六十四其葬則三月甲子也公將卒謂家人曰吾死無憾惟永違闕庭是遺恨也命左右草遺疏以戒聖躬言不及其私公既卒輟朝三日賜吊祭謚曰文簡嗣子文源上遺疏上惻然爲賜批答遣近臣讀于殯前公清癯風儀嶷嶷善談論與人嬉笑不矜飾神氣疎爽志曠如也至有所爭奮髯長跪其目燁然見者爲之改容治身儉約家人請爲公斂衣公止之曰吾喪先妣吾家貧斂衣不能盡吾心也吾何忍領爲斂衣乎及公卒斂無一衣至旬貸然後乃斂其

文章奇偉佚蕩長於論辨詩尤適警有遠韻三淵先生金公昌翁嘗語人曰李某之詩非今人之所能及也公自號曰晉菴有文集十卷藏于家其配曰貞敬夫人恩津宋氏順興府使相維之女禮曹判書奎濂之孫無子以公族弟珍山郡守國輔子爲之後卽文源也女三人長適趙琰次適吳載純次適徐有防庶子一人幼公在相府務進清流李台重南有容李存中皆公所進及旣老樂善不懈見人一能則喜心達於容貌惟恐人之不知也其閒居名論益高以當世賢士大夫進退榮辱爲其憂樂豈公志不忘王室

其將有所施爲歟悲夫銘曰

李公休休疏中坦外無方不廓而度孔大有偉文章
何知之達聞義輒服曾不踰日公立王庭則忘軒
冕如鶴在樊其思甚遠公居相位旣廉且潔曠然自
虛不滯一物衆皆察察獨誕其節衆皆踰踰獨正其
笏王曰元輔予知之晚人雖百訛恩猶不損以予
輟軫與予輪軌衡之從之元輔是倚公曰明主曲
全臣身得不離尤明主之仁榮祿匪福令終惟福
今公之終終于榮祿卬卬其氣烈烈其神銘以晰之
告于無垠

贈朝奉大夫弘文館正字兼

經筵典經春秋

館記事官李君墓誌銘

并序

上之二十有四年冬

上閱文純李先生滉聖學圖

取所謂兼夙夜者試諸生至君望賦

上大悅曰讀

其文可知其人之有學識也乃以

御筆手批之擢

置第一近臣無不爲

上賀於是君望之名聞於四

方後二年將賜及第先一月君望終焉

朝廷惜之

贈弘文館正字兼

經筵典經春秋館記事官君望

諱鎮國姓李氏全州人也父曰塤承政院右副承旨

娶長水黃氏慶尚道觀察使忠烈公諱璿之妹

贈

淑夫人夫人端潔好禮法君望五歲喪其母忠烈公見君望貌謂乳者曰吾甥之貌與吾妹無以異也君望旣長嘗執鏡泫然而泣曰吾不識吾母之貌而舅氏嘗謂吾貌如吾母宗族聞之亦皆流涕君望多病不能力學然頗喜古禮節文尤精於深衣之制爲袂之高下與祛之長短一以人身爲之度方圓平直皆自合於規矩繩衡裕祿旣成不違尺寸其燕居朝夕服之人不見其不稱於身也陶菴先生李公綽講道丘園君望踵門請爲弟子進退跪坐甚有禮李公喜謂學者曰是黃忠烈公之甥也其英才豈易得哉君

望歸告其友曰李先生真儒宗也吾得賢師矣已而疾篤不得從李公以學李公卒君望終身思李公若親弟子嘗以爲陶山吾母之所葬也陶菴吾先生之所居也因名其室曰陶齋及病少間始中第僅十六月竟以病終于家卽庚午二月十五日也享年三十六其四月某日葬于楊州石室之原君望旣歿士大夫爲深衣者求君望所傳衽法以裁之皆嗟歎曰今之深衣非禮也李氏出於莊憲十一子諱琛承旨之考諱廷亮官至府使祖諱某不仕曾祖諱某官至縣監君望爲人明秀靜雅事父母必盡其愛承旨公

事無巨細詢君望然後乃決君望繼母韓夫人雖無子君望在側猶嬰兒能順其志韓夫人爲之怡愉而忘其無子也明於譜牒自父母而廣之達于無服以致其敬又嘗著家禮酌通行于家配曰令人延安金氏振威縣令相說之女懿愍公悌男之五世孫也生男三人女一人男長心淵次兢淵次齊淵女嫁金魯翼余於君望爲內兄嘗愛君望所爲深衣悲其多病而不能從師學禮也乃爲之銘曰

深衣之績兮其純不差深衣之縫兮其袷不衰嗚呼君望愷悌以爲衷兮耿介不瑕齊之要之以昭其禮

者邪

通訓大夫司諫院獻納兼春秋館記注官蔡公

墓誌銘

并序

恭僖王二十八年大學生陳宇上疏言金安老姦邪可烹安老怒立繫宇獄遂殺之蔡公無逸與宇善坐竄南海安老公之姑婿也朝之士大夫相與語曰蔡某不附安老而乃與陳生友善誠烈士也居三年公始赦還恭僖欲將褒顯之不幸疾卒豈不惜哉公字居敬仁川人也王氏時尚書寶文以文章進大學士後九世弼善諱倫入國朝事莊憲爲名臣卒

贈參議參議生諱申保官至南陽府使 贈吏曹參
判公之曾祖也祖諱壽禮曹參判兼弘文館提學謚
襄靖父諱胤權典牲署參奉公幼明敏襄靖公常置
懷中與之聯句嘉靖元年舉國學生員第一安老用
事公嘗冬適安老所手扇搖之安老笑曰天大寒何
以扇爲公曰貴人家甚熱不知其寒也安老大恚及
公發解安老不悅曰此子若中第則吾曹必盡殲矣
乃竄之及安老敗始登第補承文院正字選拜承政
院注書遷司諫院正言司憲府持平明年出監扶安
縣居歲餘入爲禮曹正郎改司諫院獻納兼春秋館

記注官由奉常寺僉正陞漢城府庶尹充嶺南檢田御史未復 命奔母之喪以病卒某年某月某日也享年五十一某月某日葬咸昌縣承統山某原配淑人星山裴氏司憲府監察實之女也生子二人女四人子曰有隣司憲府監察曰有光 贈僉正女長適高允緒次適金希慶次適宋連慶次適印自信公好學兼通星曆卜筮音律篆隸皆極其妙又工於畫嘗承 命畫 王御容然未嘗以畫求知也爲人高簡從祖兄無擇陰附安老爲羽翼公諷刺之卒以是幾陷於死而其志猶不挫也崇禎十年公曾孫平市署

令以恒上疏斥和議與文正公金先生尚憲逮瀋陽
獄卒不屈後四十年公玄孫生員河徵上疏訟文正
公宋先生時烈坐竄北邊其有公之遺風乎銘曰
其守也介其言也厲三歲之黜榮及後世

通政大夫刑曹參議魏公墓誌銘

并序

始昭敬中興之時甄拔處士而湖南魏氏二人最
有賢名孝子德毅自閭里徒步勤王二千里召見
行宮及還都選爲知縣辭不赴公以遺逸舉於鄉
與文烈公金千鑑忠毅公崔慶會誓復王室故湖
南忠志之士倚以爲重公諱大用字景行其先中國

人也新羅中鏡始來仕賜食邑於懷州懷州今爲長興府其後子孫因家焉至王氏世大學士溫爲名臣公大學士十二世孫也曾祖曰由貞生員祖曰元忠郡守父曰億文副正公少好學有文辭嘉靖三十有四年舉進士名重大學與文靖公尹斗壽相友善未幾南歸治六經不赴貢舉逍遙於丘園之中平秀吉亂公時年六十三矣寢疾病不能從軍乃貽書湖南義士勉以殫事金文烈公崔忠毅公薦于行朝王嘉之下教特除刑曹佐郎辭不就萬曆二十五年教曰魏某養志林泉義問尤著其陞爲通政大夫明

年授刑曹參議又不就三十八年四月初二日卒于家享年八十一某月某日葬于府南介孫之原配淑夫人光州金氏承文院校理浹之女也生子一人曰弘宙軍資監正 贈戶曹參議參議生子三人女二人子長曰山寶僉正次曰廷寶縣監次曰國寶通德郎女長適主簿鄭敬一次適將仕郎崔渙縣監生子四人曰天機曰天樞曰天杓曰天枓女三人長適白漢羽次適府使宋後璟次適李松龍通德郎生子四人曰天耆曰天奎曰天會曰天相爲內乘秀吉之亂昭敬西遷公儒者猶遣家僮具弓矢裹餼糧以助戰

士嗚呼仁哉公七世孫榮國等請爲之銘銘曰
大人友之烈士舉之爵下大夫而守不移汭水湯湯
以泝以沿維公之風永世其傳

贈通政大夫承政院左承旨兼經筵參贊官

黃公墓誌銘

并序

公諱坤載字載謙長水人也議政府領議政謚翼成
公諱喜之八世孫也康靖之際翼成公玄孫吏曹
參判孝獻與其兄吏曹正郎汝獻皆能詩賜暇湖
堂黃氏文章自此始至恭僖時大夫恬與其弟博
又以文聞於當世入弘文館爲正字世所謂兄弟南

床也於孝獻爲族從子 昭敬時恬從兄子文貞公
諱廷或承二叔南床之後文章益高由檢閱進大學
士遂執文柄學者稱芝川先生公之祖也父諱頤權
知承文院副正字出爲伯父參議諱廷式后光海時
竄死興陽 贈司諫院司諫兼春秋館編修官母曰
李氏 贈淑人判官諱緇之女也公生三歲遭倭奴
清正之亂司諫公父子兄弟從 王子入會寧府爲
賊所執女奴負公走深山受草葉露以乳之竟得不
死及旣長工於文章人以爲才思敏達雖王子安不
能及也當是時文貞公位大司馬與崔立之掌辭命

蔚然爲文章之宗司諫兄弟襲其美並耀詞林故一時騷人學士日造於文貞之門公自幼時從父兄與遊於翰墨之場金馬諸公莫不獎歌詩之妙學識之邃也嘗赴貢舉諸生輩質問題解所由出試官輒曰何不叩問於黃某也由是諸生操筆硯環公之座而質問之公端坐左對右應不少倦風采動人諸生竦立而觀之以先覩面目爲幸光海二年成進士後三年別試發解以其年二月初八日未赴會圍而遽卒享年二十三安東權鞞聞公之卒爲之傷悼曰璧月沈矣文星賁矣乃作詩以致其哀然公旣卒之六十

五日司諫伯氏承旨公被仇人申慄誣告與其孫裳死於獄中司諫坐逮而公已卒不被繫傳曰桎梏死者非正命也黃氏禍作公能先六十五日終於衽席不死於桎梏之中嗚呼可謂命也已公爲人明純朗和好讀書雖馬上吟哦不輟馬入他家而公猶未之覺也配孺人慶州金氏議政府左議政命元之孫別提守仁之女也有子一人曰裒全州判官判官有子三人女三人子長曰爾中次曰爾明舉進士官至府使次日爾章禮曹參判女長適李義著次適金尚鉉知事次適任弘望知事曾孫以下若干人公之在殯

也司諫安置鍾城府孺人金氏亦坐逮已而被釋以
某月某日葬公于金蠅之原公玄孫兵曹正郎處浩
狀公之行屬余爲銘銘曰

有玉於斯其白嗟嗟不受乎刃不入乎火天降文章
與玉齊光卿雲覆之俾不罹殃公先家難六十五日
居然令終免於斧鑕墓門永靜其樹有蔚英英不滅
文章之氣

嘉善大夫咸鏡道觀察使兼兵馬水軍節度使
巡察使咸興府尹黃公墓誌銘

并序

上之二十七年北方大饑人將相食廷中皆曰漢城

府右尹黃某以廉潔號爲循吏如授之節使往撫之
則北方二十三州之民可活矣於是大臣舉公爲咸
鏡觀察使兼兵馬水軍節度使巡察使咸興府尹公
將行召見便殿下教曰北方連歲飢饉古未之有
也予每思救蓄之策夜不安寢今得卿爲觀察使予
其忘北顧之憂矣公遂感激及旣至請移嶺南郡縣
粟予民爲糴又出庫錢送嶺南以易粒米又請貸嶺
南縣布之屬備邊司者易之粟得萬餘石皆下于海
輸之關南北諸郡先是朝廷猶不知北路饑荒之
甚或以爲請粟過多上曰黃某謹簡慎約必能知

予憂勞之意不使予元元之民填於溝壑也乃命
嶺南觀察使督船轉輸由東海達于六鎮風不利公
有憂色雖中夜正衣而坐輒問風從何方來彷徨不
寐當食感然曰民將盡斃吾雖食不能下咽爲損其
膳至春夏輒進麥飯不食梁米雖尺布不與其家曰
民饑如此吾不敢卹我妻子悉以其俸振諸民度州
縣緩急與民口多寡爲之差等以哺之凡米鹽微細
之事必殫心不敢少忽賓客諸將或諫曰何勞之甚
也公喟然歎曰鐵嶺以北二十州赤子將盡矣吾爲
觀察不能濟則何以歸報我聖上乎吾雖病而赤

子少蘇是吾願也民聞之無不感泣是時北人多無
牛不得耕作公爲買牛勸民耕田秋大熟北方之民
得免流亡野無餓莩者公之力也然上未及召公
以歸而公已病矣竟以明年十二月二十八日卒于
北方享年六十四北方之人無少長莫不奔走號哭
或爲之蔬食曰吾等不饑而死者皆公之賜也今公
在殯吾等何忍食肉乎父老士女持酒食而來奠者
絡屬不絕旣又相與鑱諸崖曰黃公之德不可忘公
諱戢字陽甫幼明秀警悟出人與諸兒游榛莽中遇
蝮蛇一兒被傷諸兒驚皆避蛇走獨公不去輒呼兒

父母以救然後廼去年二十九舉進士肅廟四十
五年中丙科權知承文院正字忤賊臣金一鏡意出
爲察訪麒麟道景廟二年入侍講院爲說書由成
均館典籍遷兵曹佐郎兼春秋館記事官與修肅
廟實錄三年拜司憲府持平兵曹正郎充書狀官赴
燕都四年復入侍講院爲司書是時今上在東宮
公請裁抑中貴人今上褒納公之見竒自此始移
司諫院正言出監牙山縣縣有貢津倉歲漕湖左諸
州粟縣民所負糴米至數千石公爲上疏遂蠲之今
上三年授文學以都廳郎與修景廟實錄四年由

掌令陞執義丁父憂選入弘文館服除遂拜副修撰
爲湖南暗行御史七年秋上如長陵以副修撰
從至坡州爲畿輔暗行御史冬爲湖西別遣御史累
遷修撰校理獻納應教兼東學中學教授轉執義陞
司僕寺正備邊司啓差爲郎八年以和順翁主嘉禮
都廳勞陞通政拜承政院同副承旨九年薦授義州
府尹公至則大修兵械謹守約束吏畏之不敢犯法
居十月邊境肅然白金錢財美餘者積於府中悉與
民以紓繇役清御史至鳳凰城語譯者曰府尹之廉
簡公明吾所心服也欲以不腆之幣遺府尹以彰其

賢而府尹必不肯受是以不敢也公在州常飲米飲
及將歸義人手錢遮馬首而擲之曰乞以是歸具米
飲公皆不受有丐者來獻麥餅曰流丐之民亦賴公
而得生焉今公歸矣請以此爲餞公笑而受之十年
由右副承旨兵曹參知擢拜忠清觀察使會仍舊觀
察改禮曹參議夏出爲安東府使辭行 上召見諭
曰府使在予左右久予固知府使之材不當止於百
里也然府使宜悉予意作成人材無忽也公旣至大
興儒學選子弟授以經術士有不孝於父母者公爲
餽膳羞與米因手書以與之曰供孝厨及其來謝益

勉以人子之道其人感服卒能改行爲孝子十三年
遷司諫院大司諫安東民詣觀察使言吾州之俗未
嘗有去思碑然黃侯治化卓異宜立碑於烏嶺以示
後人觀察使以無故事不許十四年出牧安州安卽
公皇考參判公所嘗出守之州也其父老聞公之來
歡迎相語曰是故黃侯少郎君也公於是益勵民政
未盡九月州以大治其後關西御史啓言義州前府
尹黃某清慎有異政邊民至今以爲德及爲安州以
惠愛得民心旣去而州人猶思之上曰黃某之廉
謹予已知之矣入爲刑禮二曹參議十七年除延安

府使其爲政如治他州北關饑議遣御史以振之大
臣舉從官數人上顧謂大臣曰予得一人黃某是
也大臣曰古者有三品御史而今無之且黃某方任
延安府矣上乃止居三年免明年由兵曹參議出
爲清風府使治民簡易民大悅去愈思之至鑄鐵爲
碑以紀其愛二十一年召爲大司諫明年以禮曹參
議監修義陵勞陞嘉善拜工曹參判初左議政宋
寅明言黃某以廉潔聞誠可謂恬雅之士也居下大
夫十有五年才不見用豈不惜哉上曰予在東宮
時黃某以僚屬請敕中官近世士大夫請敕中官獨

黃某一人而已又明年授寧邊府使二十五年以病
罷上特命調理察任盖異恩也秋召拜戶曹參判
以副使又赴燕都明年爲海西畿輔均稅使公單車
行海上視魚鹽虛實薄厚舟楫大小身自考覈以平
其稅寧損於上無虐於下以故有司見兩路稅入之
數心少之往往誚公然畿海之民無一人怨公之法
者十二月除刑曹參判兼五衛都摠府副摠管承文
院提調公嘗進見上顧世子曰是予東宮時舊
僚屬也其才可用而未得一試甚可惜也明年以右
尹觀察北方又明年正言尹得養以微事論罷大臣

從容爲上言黃某在北關荒政甚善今遽罷去臣竊惜之兵馬評事南泰會歸自北方言黃某惻怛救菑幾廢寢食北人安集得不流散者皆某之功也上喜曰予固知黃某能如是矣卽下教仍公觀察顧世子曰黃某必上書辭以予意善爲慰諭也公固辭終不之許及訃聞震悼下教曰觀察使某以東宮時舊僚屬予知之熟矣晚登宰列誠可謂沈且屈也及授北藩予心以謂得人矣何遽卒邪命有司賻卹有加公爲人英粹清和子諒豈弟與人言仁心藹然未施恩而人感之平居儉約無所好食不兼

味雖處卿宰蕭然若寒士歷守七州而田宅不增於
前持身潔廉以自刻所至皆有清名雖不悅公者亦
不敢疵議事親孝謹與諸兄友愛甚篤恤兄之孤如
其子仁於宗族盡分其所得俸祿家無餘粟其在朝
持議寬平而臨事通敏人不可及侍讀 經筵凡三
年論思剴切多所補益屢上劄極言 君德卒以是
遇知於 上而公不喜與人徵逐於名利泊然無進
取之意以故祿位不光顯白首始居北藩竭誠盡瘁
竟以柩歸嗚呼歛矣黃氏世家長水縣翼成公諱喜
事 莊憲王爲名臣配享 廟庭後六世生文貞公

諱廷或以文章顯 昭敬王世位至兵曹判書兼大
提學生諱奭承文院正字 贈司諫院司諫出爲伯
父吏曹參議諱廷式後公司諫之玄孫也曾大父諱
坤載少舉進士能文章 贈左承旨大父諱裒全州
府判官 贈吏曹參判父諱爾章禮曹參判母貞夫
人安東金氏江華府經歷世輔之女也公夫人曰全
州李氏大司諫彥經之女柔惠端恭事皇舅能盡婦
道公家貧衣食不給而夫人勤苦自治以取足不使
公知也及公旣貴未嘗以侈靡爲意撫妾御寬而有
恩先公六十四日卒生女六人無子以公之兄安陰

縣監某次子處龜爲後處龜早歿又取從子處斗子
瑗爲處龜後女六人嫁韓師一趙漢源柳漢箕李運
喆鄭益儉洪聲漢處龜一女嫁李翼公有側室子一
人曰處洙女二人幼公卒之明年三月二十二日葬
交河郡金蠅之原夫人祔焉景源於公爲族曾孫然
公以子弟視景源其在北方聞景源爲吏曹參議亟
致書勉以清慎嗚呼此公之所以自勵也其所至顯
名於時有以也夫銘曰

黃列顯姓文貞維哲爰暨厥兄忠我王室其光烈
烈公實繩之面折賊臣而不牽隨賊臣方橫遂黜驛

置世弟仁聖公以僚侍謂彼寺人驕不可長世
弟曰咨知爾之莊及其卽位寵之經帷三試御史
及尹西垂清人行徼亦譌其廉周流七州何德之潛
北方告饑命公作伯蔥旂金戚往勞惇獨船粟東南
海水千里風逆公憂風順公喜其粟旣至北人蹈舞
爲饘爲粥若子有乳响之濡之俾樂厥生士曰我田
將伯偕耕女曰我麻與子同漚北人載安璽書以
優公車不南胡復其衣豆江洋洋北人之思公心豈
弟其潔如冰小子作銘以告無窮

興祿大夫東陽君墓誌銘

并序

公諱桡字思奭以 贈吏曹參判諱家碩之子爲全
安君諱潢後故於朗原君諱侶爲孫於 昭敬別子
仁興君諱靖孝公諱瑛爲曾孫也公旣長授東陽守
後十一年進封爵爲東陽君時年二十有八景源始
爲童子時與公同學然景源昏鈍無能又不強記公
明達臨事精敏於文字不求辨解而一見靡不穿穴
凡經史百家之言久而不忘容貌耿介無纖毫驕客
之氣嘗謂景源曰士生斯世旣不得行其道又不能
全其身雖有文章亦何所用哉吾將隱而不出以終
其世也未幾公以東陽守列於宗臣今 上三年校

正御牒加明善階陞正六年用宗簿寺講第一加
明義明年兼五衛都摠府副摠管二十七年進中義
明年懿昭世孫卒差守墓官及葬下教加崇憲
明年小祥加承憲已而臨墓召見之又加嘉德又
明年特加綏德大祥復命加興祿陞正一品然公
居位三十年足未嘗一出門外卿士大夫無一人識
公面者豈其志將以宗臣而隱者邪公爲人端方雅
潔所居舍不蔽風雨而泊然不以爲意事父母以孝
謹聞於所後母平山郡夫人申氏能致其愛申氏歎
曰有子如此吾不知不出於已也及申氏歿善居喪

朝夕饋奠必躬行處於倚廬雖大暑不脫衰服也從
母窮居無所歸輒母事之與妹子同室以居而恤之
如其子焉以甲戌五月十一日卒于家享年五十二
其年七月某日葬楊州金谷之原公位在宗臣之列
不爲世用然恩遇終始不衰初差守墓官也病甚
篤上命太醫往視之爲賜珍膳其後又遣太醫
往視之居三年公病益篤上臨墓命中貴人賜酪
粥及訃聞遣使弔祭賻恤甚厚公初娶驪興郡夫
人閔氏生一子曰彥蓋縣監再娶高興郡夫人柳氏
無子三娶彥陽郡夫人金氏生一女適尹靖烈側室

有一子幼公少時明邵氏易嘗飄然有遺世之志雖
不爲宗臣之後必隱居以沒其齒也其疾革顧謂彥
盡曰知我者惟黃某乎及旣卒彥盡以狀屬景源而
爲之銘銘曰

公後朗原 昭敬之孫齒彼朱芾其德溫溫於奕東
陽維爵之尊清慎之容不與衆渾退食閒閒庭無一
喧左圖右書如在丘園隱于宗臣其介則存精於邵
易洞曉玄源自余幼時從公講論辱知者深銘此墓
門

處士權公墓誌銘

并序

湖西之韓山郡有處士焉曰權公諱尚字渭叟少慷慨應有司舉不得志一朝拂衣歸鄉里與其妻孺人李氏養所後母以孝聞仁於宗族篤於故舊韓之人高其行誼皆以爲隱君子也公以處士諱悌次子出爲仲父奉事諱惕後祖諱謙曾祖諱脩皆隱德不仕公所後母曰宜人驪興李氏縣監晦叔之女也公少孤事李宜人如嚴父每夕跪告曰明日將墾某田將溉某水宜人可之然後行焉非有疾未嘗頃刻去於側宜人喜曰吾雖自生顧何以加焉公有二甥宜人之外孫也幼喪其母公憐之鞠養于家嘗病痘手自

爇藥立則負之坐則抱之連九夜爲廢寢食一不使
婢妾攝之宜人喜曰兒能愛吾女之子如其子吾雖
死亦無憾矣故宗族見宜人之喜而信公之有行也
公於書最好大學朝夕諷誦而孺人能通孝經及列
女傳夫婦間與相講說嘗夜讀史紀至孝子忠臣烈
女之事輒相視泣下霑襟公旣勤力農畝而孺人閉
戶治繭不踰閭終日織紵而杼聲聞於戶外故宗族
見孺人之賢而信公之有道也公於親黨有恩義族
子搢孤貧不學爲給衣食置傳而教之及公卒搢欲
喪三年以無於禮而止與人交不苟合見人之過雖

卿士必面折之樂施與家有名騾日行數百里立與其所與游者無所惜公平生急人之難雖千金猶不惜也予人一騾不足多然朋友交游之際其氣義亦可觀也權氏之先安東人觀察使諱擘賢而有文章與尹潔安明世游嘗稱疾不出門巷賓客至默默不言二人歿觀察獨免有子曰韜公高祖也官至松禾縣監與其弟鞞俱有名鞞尚氣節好議論松禾歎曰吾弟必不免矣卽棄官之韓山郡其子孫因家焉權氏世有隱君子何其奇也公爲人魁偉卓犖遇事敏達能懸斷人之善惡物之成毀鮮不中有志於世而

未之仕也公以

肅廟四十三年戊戌四月十七日

卒于家享年五十九初葬林川郡龍谷之原後三十

八年某月某日改葬韓山郡斗門之原李孺人承旨

益泰之女也今

上八年壬子五月丁丑卒初葬韓

山郡圓嶺之原後二十四年祔于公墓公無子以其

弟霽之子援爲之後賢而又無子以族子袞爲嗣公

有一女嫁黃公諱晏援之妻朴氏使晏子處斗爲狀

屬余誌之朴孺人爲舅傾貲旣刻石立于墓又將求

銘而納諸壙嗚呼權氏有婦矣余於是知權氏不獨

世有賢子又能世有賢婦可謂盛矣而卒皆無子豈

非其命也哉銘曰

子之於父天之屬之子人之子人之續之然暮衰之親也功總之族也變以繩纓移以苴服終不若由性而生戚也嗚呼權公敬事所後曰考曰妣隆於父母孺人從之婦道是守謹謹繼孝吾姑吾舅凡天下之爲人後者行如權公則夫何不孝之有哉

通訓大夫清州牧使清州鎮節制使安公墓誌

銘

并序

故世子侍講院文學李公嘗謂景源曰瑋有友三人其一金君山其一申正甫其一卽安朝卿也君山

正甫先我死獨朝卿與余往還余朝暮又將歿矣將
托孤於朝卿朝卿必不負余矣李公既卒景源復從
安公游聞室中有讀書聲問之乃李公之孤也安公
泣曰余教李公之子能有立則歸見李公可無愧也
景源於是知李公之能有友也安公諱宗海朝卿其
字也曾祖諱縝禮曹參判祖諱相億游文正公宋先
生浚吉之門以儒學徵爲世子翊衛司副率父諱
允迪贈承政院左承旨公幼侍副率之側尺寸不
敢有所違副率喜曰真順孫也肅廟四十一年舉
進士今上二年補光陵參奉中貴人嘗求檀木

公以爲陵樹嚴重豈爲宦者擅伐之邪遂格不許
中貴人恚而上聞上曰陵官舉職勿問也遷濟
用監副奉事由尚瑞院副直長陞司導寺主簿改刑
曹佐郎未一月司僕寺辟爲判官會有言者論其驟
公卽棄去久之拜漢城府判官丁大夫人憂服除薦
監公山縣公於湖左最難治歲又大饑閭里蕭然無
人煙公歔歔曰民將盡矣乃爲饘粥集饑民躬自饋
之時大疫歿者相續而公出入癘氣中視賑自若自
冬至夏所濟活凡九千餘口賑旣畢悉出粟米贏餘
者以予饑民或曰美餘畱縣中別備兵荒可也公曰

別備以干時譽是余羞也居一年坐漕後期下獄免
尋授工曹正郎是時國中連三歲大饑朝廷爲置
賑民所命朴文秀主其事又選郎僚之可以任事
者公在選中以勞進監錦城縣與統禦使有親嫌未
赴而免已而出守沃川郡居未幾正言洪啓裕以前
事劾公上問筵臣遂無實乃寢自沃川歸旣三年
以義禁府都事入刑曹爲正郎陞司導寺僉正坐事
罷明年起拜司憲府監察辭不就已而出守沔川郡
郡有豪黨武斷州閭公曰此民之蠹也乃以法痛繩
之豪黨切齒公在沔川凡三年陞清州牧爲獻納權

賢所劾及既歸御史尹得載過沔川聞豪黨言啓論
之公遂繫獄 命觀察使按其事卒不得以微罪配
龍田驛五月釋還自是屏居不復仕以甲戌八月二
日卒于家享年七十四始公疾革謂其子曰吾聞歿
生有命何以醫爲遂却藥三日而終十月某日葬于
楊州海村之原公爲人夷曠疏亮有遠慮容貌閭如
也其事父母以孝稱與弟同居弟已歿爲鞠其孤甚
有恩樂易愛人未嘗爲深刻之言然賊臣柳鳳輝弟
爲公友婿公嘗言鳳輝逆節最著豈可以友婿之兄
不請討乎乃與太學生鄭棖等上疏論鳳輝之罪人

以爲難安氏之先竹山人良孝公諱孟聃尚莊憲
王女貞懿公主封延昌尉公其後也公配曰淑人坡
平尹氏杆城郡守夏教之女生子二人長曰栻生員
次日杓弘文館修撰女四人長適府使金述魯次適
佐郎黃公卽景源叔父諱獻次適趙浚慶次適進士
南公輔內外孫曾若干人景源少時嘗從公登飛來
峰公甚樂已而酒酣誦李公飛來峰詩泫然泣下曰
吾游於此而李公已亡矣今誦其詩如見其爲人也
因爲景源道李公風流甚詳嗚呼朋友道喪久矣又
安能恤其遺孤至死而不忘哉李公旣歿公悲之如

喪兄弟豈其心篤於人倫者邪銘曰

義能存朋友之孤惠能振乳獨之饑剛能絕姻婭之
親莊能斥宦寺之私而蜚語乃反中傷庶百世考茲
銘詩

進士李公墓誌銘

并序

公諱泰齡字大叟 恭定別子靖孝公諱補之九世
孫也高祖曰卿雲光海君時以司諫院獻納劾李爾
瞻遂坐黜名振一世 仁廟靖社公已卒 仁廟歎
曰直臣亡矣惜乎予未及用之因 特贈禮曹參判
曾祖曰光泌景陽道察訪 贈司憲府執義祖曰頤

賢舉丙科以文學聞忤許積不得選入藝文館官至
相禮父曰萬堅好學不仕公生于顯廟七年出爲

伯父諱萬基後幼孝謹步趨中禮搢紳長者皆重之
知其有學也及旣長造文正公宋先生時烈之門氣
和色莊應對恭敬先生目之曰李氏子誠遠器也若
能專意爲學問則成就不可量也公退而喜曰泰齡
始得依歸矣肅廟十有五年宋先生流于濟州已
而賜死公族父布衣萬亨將上疏直先生屈言於宗
族曰欲辨先生之冤非大叟不可草疏乃呼公以筆
屬之公於是爲正衣冠立草疏悲憤泣下一座無不

改容明年春公成進士以其年八月癸酉卒享年二十五初葬金浦胎藏山今上三十有八年五月辛丑改葬富平遠浦之原公爲人清純敦固喜經術明於周易春秋傳考校箋註以窮其微言精義處一室終日危坐不少怠學者敬之皆以爲大叟修己非諸儒之所能及也配曰孺人清風金氏縣監晉明之女忠簡公權之玄孫也慈惠明淑今上十二年九月己未卒祔于公墓子曰顯陽有潔行不幸早世生子一人女二人子曰興宗舉乙科今爲承政院右副承旨女長適俞漢采次適趙遠慶銘曰

不艾而折謂之不幸勉勉篤修惟志之永

通訓大夫和順縣監羅州鎮管兵馬節制都尉

沈公墓誌銘

并序

陶菴先生李公絳爲景源言安素沈公有學守內行
修潔縉伯父判吏曹時薦于朝遂除齋郎而伯父猶
恨其晚也景源未及見沈公然李公推重如此則沈
公質行之美可知也已公諱元浚字善長青松人也
少好學師事南溪朴文純公力行不懈朴公嘗謂人
曰善長勇於求志其成就不可量也乃告以道德淵
源陰陽性命之理公由是日夜沈思久然後有得於

心故造養日益精粹與故 世子贊善金公榦相友
善朝夕切磋以爲樂家甚貧藜藿不給而閉門二十
餘年不求人知嘗自號曰安素齋每夜斂衣誦孝經
啓蒙諸篇聽者爲之忘寢性至孝母恭人朴氏疾革
公斲指出血以進及居憂廬墓三年有猛虎至公廬
下公端坐容貌不變讓虎曰汝至靈之獸也有如害
我使不得終母之喪是我至痛也汝有知何不退歸
虎感動搖尾而去終三年不敢復至公廬下 肅廟
十八年以經明行修薦補 齊陵參奉坐事罷四十
二年拜 慶基殿參奉改 長寧殿由繕工監奉事

尚衣院直長遷歸厚署主簿義禁府都事 景廟元

年出監和順縣縣民好訟不遵禮教公爲頒呂氏鄉

約諷勸之縣中大化士至今頌公之德居四年以甲

辰五月二十三日卒于官享年六十二其八月某日

葬于楊州妙寂山南德水之原公爲人仁亮恭介與

人言必本孝悌以開之或言人過則默然不應也平

居嚴敬無褻容嘗過海西見橫民與其母相爭輒止

馬杖而責之橫民感服卒改其行爲孝子沈氏之先

曰德符封青城伯後六世翼孝公綱以 后父顯

明廟時公於綱爲五世孫其曾祖諱愉進士祖諱廷

直縣監父諱柱通德郎公初娶坡平尹氏琇之女生
子一人女一人子曰澈參奉女嫁府使李弘植後娶
完山李氏時蕃之女生子一人女二人子曰濤女長
嫁李國珍次嫁尹萬東參奉生子一人女二人子曰
亮賢進士女長爲景源夫人次嫁李寅白府使所後
子曰宗珍濤生女二人長嫁安相五次幼李國珍子
曰景曾尹萬東子曰誼烈參奉將歿謂景源曰子爲
史官如誌吾先人之墓則吾目可瞑矣景源流涕不
忍辭後十九年進士君狀公之行以參奉臨歿之言
請爲誌乃書李公推重者以詒後世銘曰

曰仁不昭胡能馴猛虎之性曰義不達橫民何改其
行道既修矣靡物不正君子稱之惟德之盛

通訓大夫唐津縣監洪州鎮管兵馬節制都尉

宋公墓誌銘

并序

公諱悌字維則南陽人也少慷慨嘗讀唐書張巡傳
喟然歎曰張中丞忠義之士也大丈夫豈不能爲張
中丞事乎平秀吉叛昭敬王西幸義州公以訓練
院僉正從乘輿遂特拜唐津縣監有惠政縣民爲
立遺愛碑後數年秀吉復叛清正進兵陷州縣公遂
倡義往禦之將行誓衆曰倭奴徧於四境吾爲知縣

雖不能斬將擐旗以酬國恩又安能坐守孤城乎
諸將士莫不流涕公於是馳入晉州與結城縣監金
應鍵十日嬰城竟戰死公爲人剛方好義城將陷寄
書其子曰豺狼充斥四方余旣以身許國矣誓當與
此城俱亡聞汝輩寄身山谷待晉州匡復之日來收
吾骨於蠹石之下及城陷清正縛公欲降之公厲聲
罵曰爾雖鱗介豈不聞張巡之言乎吾頭可斷義不
可屈遂歿之丁酉七月某日也享年四十七清正亦
感其義埋其屍於城門之南表之曰朝鮮義士宋悌
之墓公曾祖曰某祖曰某父承周以孝義聞特除

參奉公配淑人綾城具氏聞公歿節乃作詩嚙指出
血題于壁絕粒而歿有子一人曰德駿濟州判官孫
曰緯南舉武科今年冬公八世孫啓舜爲公來乞銘
銘曰

鶴朝翔兮猿夜啼
蠹石高兮與天齊
侯之劒兮七尺
臨大江兮揮斥
王出狩兮在西方
孰荷戈兮掃豺
狼
侯百戰兮有餘勇
蹈白刃兮曲踊
余作銘兮納墓
門亘萬世兮長存

通訓大夫三登縣令成川鎮管兵馬節制都尉

張君墓誌銘

并序

申之姓張氏諱錫履文忠公維之五世孫也高祖諱
善澂禮曹判書謚正莊曾祖諱植天安郡守祖諱震
煥高城郡守父諱至中司饗院奉事申之幼時爲伯
父 徽陵參奉諱至大後年二十四補 長陵參奉
由義盈庫奉事司饗院直長掌樂院主簿入司憲府
爲監察陞平市署令今 上三十七年出爲三登縣
令明年秋病免未歸十二月二十五日卒于官舍享
年三十二初文忠公以大學士退居江上治月波亭
及旣卒子孫零落而亭址入忠勲府申之傾貲而贖
之時從賓客登亭上以望湖山鄰里皆曰文忠公有

孫矣申之爲人端潔孝謹事本生母李孺人能盡其誠養弟妹之未嫁娶者以至成人其居家躬自儉約未嘗有侈靡之容在平市時上召見顧近臣曰雖爲官擇人之時何以過此其爲縣謹於獄訟旁郡民服其明斷申之平居多疾病不喜仕宦嘗謂人曰吾誠得一丘一壑使妻子欣然自得如陳季常足矣未幾而卒其明年癸未二月十二日葬安山郡先人之兆申之臨歿作遺命以戒其子槨母厚祭饋母豐宗族皆稱其達申之世爲德水人其配曰延安金氏集之女生子三人一曰鴻其二皆夭始余以罪流嶺外

朋友故舊皆惴惴不敢相問獨申之自三登縣能致書絕海之外叢棘之中意甚厚何其賢也銘曰
純以雅世其德令一縣何疾亟志丘壑歸不得瘞銘
辭昭無極

處士李公墓誌銘

并序

忠穆李公時稷之兄曰時益少從沙溪文元公金先生游知名鄉黨萬曆末與忠穆公入懷德深山之中因家焉後徙安陰居五年又徙居昌年七十六卒于家文正公宋先生時烈文正公宋先生浚吉皆稱其賢而世人未之信也崇禎九年瀋陽兵陷江華府忠

穆公與文忠公金尚容忠肅公李尚吉忠烈公沈覲忠憲公尹炗忠顯公宋時榮引節死之忠穆公常以弓弦置懷中謂家人曰吾將以是殺吾身歿之夕出懷中弦以自殺鄉黨皆曰忠穆公能抗大節而不屈則其兄之義可知也南漢園時處士泣謂子恂曰吾雖布衣豈忍見社稷之亡而不救乎恂曰子當舉兵歿於社稷乃收鄉里敢死士三百餘人踰鳥嶺而入援焉鄉黨又曰子舉兵以衛社稷則其父之忠又可知也處士好學有賢行最深於易至陰陽消長之際未嘗不反復擊節也先時瀋陽遣使者來洪

忠正公翼漢止疏請斬瀋陽使者處士聞之歎曰洪公之義誠可與日月爭光矣巖穴之士亦豈無蹈海而死者邪及虜兵陷江華時處士曰生可耻也遂憂憤不食久之疾遂篤以崇禎十五年十一月二十五日卒明年正月某日葬于居昌縣東某原處士字聖欽延安人也六世祖文康公石亨以文章顯曾孫巖由弘文館正字官至楊州牧使於處士爲曾大父贈議政府左贊成大父廷顯出爲叔父司憲府監察巖後父賓官至青巖道察訪處士娶全州李氏斗壽之女生子二人女二人長卽恂也次某察訪女長適

崔麟次適崔震華處士有文集四卷既卒之三年爲
火所燒惜哉處士爲人純信事父母能盡子道及居
憂不離倚廬終三年能致其毀忠穆公嘗曰吾伯氏
隱居篤學有古明哲君子之風處士避地嶺南者十
餘年足未嘗一入京師人稱其介銘曰
汧出不流而上爲砮寤斯寐斯樂此禽魚雖云不仕
教則行矣弟爲忠臣子爲烈士

處士李公墓誌銘

并序

崇禎九年瀋陽兵圍南漢處士時年四十八慷慨流
涕告其父曰小子請赴行在戰歿於南漢城下其

父許之處士乃收鄉黨宗族之有氣義者得三百人將踰嶺衆皆曰李處士寬厚忠信有大節真所謂三軍之帥也乃推處士爲義兵將行至烏嶺瀋陽兵已解圍矣以故處士不果行當是時自都元帥金自點以下皆擁兵不肯勤王而處士以一布衣不顧強弱率三百餓羸之卒千里赴難欲歿於王家之事故義聲震於四方嗚呼大夫歿國之難者固少矣而士之歿難者加少矣當城圍未解之時使處士不率義兵赴行在是嶺南無一士也世以爲處士之義於嶺南有光輝者不爲過也使城圍四日不解則處

士所將義兵三百人可抵南漢矣三百人雖不足以
抗虜騎而必能一死於白刃之下矣孟子曰舍生而
取義處士之謂也處士諱恂字君信延安人也曾祖
廷顯天安郡守祖賓青巖道察訪父時益承義副尉
處士性至孝父疾革焚香禱天乞以身代及居憂廬
墓三年其平居日省家廟雖風雨莫或廢也嘗讀春
秋輒泣曰吾不復見春王正月矣以顯廟十二年
辛亥二月二十三日卒于家享年八十三其四月某
日葬于居昌縣東金龜之原娶碧珍李氏慮之女生
子三人女四人子曰德輿曰德宇曰德基長適河海

宇次適張宇翰次適鄭有宗次適金慶泰文肅李公
一相謂其宗族曰聖欽有高世之行使其子倡義赴
難而其弟歿於江都人所難及也吏曹以處士之孝
義將擬齋郎處士歎曰吾無孝義之實而有虛名甚
可耻也固辭乃已銘曰

奮於遠趣於危蹈仁不疑復天常章父教是以爲孝

李毅父墓誌銘

并序


景源屏居有跛者立於門外執贄而言曰思弘故韓
山伯文靖公穡之十三世孫也幼好兵法日走馬以
習劒術若將荷戈而轉鬪大漠之外也不幸足跛不


能行卽棄兵法始閉門爲古文詞聞先生深於史記
長於議論善教人故思弘踵先生之門而請執弟子
之禮先生烏可無誨哉景源固辭君對曰爲人弟子
雖百工技藝之學必束脩而見其師者所以尊其學
也今先生何以辭焉於是景源乃受贄教以文章不
期月君能力學若有惰氣萌於心則必免冠自解其
袴命童子撻之流血而後止嘗登高樓去其屨客從
樓下仰而責曰客來不見何也君笑曰主人著書客
雖來不可登樓終不顧客怒而去君學文章凡九年
其材益進而跛益甚未幾沒壬戌五月二十三日也

時年二十七初葬公州榛谷原戊寅四月改葬日新
原君姓李氏字毅父以通政大夫敦寧都正諱秀輔
之子爲嘉善大夫司憲府大司憲諱秀得之後祖諱
萬稷通政大夫江原道觀察使曾祖諱泰淵嘉善大
夫平安道觀察使君娶清州韓氏進士宗朝之女又
無子以其兄參奉思重第四子奎應爲後奎應生二
女長適徐有膺次幼君果敢目光如電有戰國奇士
之風然內行能自修潔事所後父母至孝於宗族篤
厚有恩所著詩文若干篇與古作者不殊也惜乎以
跛不見用於當世也銘曰

吁嗟毅父兮跛不上堂長爲窮人兮猶不悲傷馳騁
文章兮將以行遠一足雖跛兮庶幾無憾

江漢集卷之十六





集漢江

八